

РУСИН

www.rusynacademy.sk

RUSÍN r. XXXII, č. 2 / 2022



Наш 60-рочный юбилант, председа
Общества св. Йоана Крестителя –
Мгр. о. ЯРОСЛАВ ПОПОВЕЦЬ.



КУЛТУРА • ЛІТЕРАТУРА • ЯЗЫК • ІСТОРИЯ



• Красных 70-ых років ся дожыв перекладатель текстів із церьковнославянського языка до русиньского літературного языка на Словакії, автор духовной поезії і прекрасных баёк, лауреат Премії Александра Духновича за русиньску літературу, яку уділює Карпаторусиньскый научный центр в США – ОСИФ КУДЗЕЙ. Фотка: А. З.

Председа Общества св. Йоана Крестителя о. ЯРОСЛАВ ПОПОВЕЦЬ ославив 60-ку

Народив ся 11. 2. 1962 в Стропкові, але своє коріння має у селі Ломне.

Гімназію скончив в Стропкові, теологічну факулту выштудовав в Братіславі. Высвячений на священника був в 1985 р. в Пряшові владыком з Югославії – Славоміром Мікловшом. Ёго перша парохія была Крайня Быстра, де діяв до року 2001, потім був переложений до Чірча, де був душпастырём до року 2015. Од 2015-го р. є парохом села Чабалівці. В манжелстві з п. Мартов їх Бог обдаровав семома дітми. Історію свого роду описав в книзі „*Valkov zabudnutá domovina rodu Rorovcových*“, выданов в році 2021. Отець Ярослав цілу свою пасторацію заміряв на духовне зростаня свого русиньского народа. Ёго добрым приятелём уж од богословских штудій, а потім і в пасторації, є о. Франтішек Крайняк.

Редакція Грекокатолицького русиньского календаря 2022 ся о. Крайняка позвідовала на дакотры интересны моменты з їх сполочного діяня на церьковнім полю.

• *Отче Франтішку, де съте ся першыи раз спознали з о. Ярославом?*

– У Братіславській богословській семінарії в р. 1980, кедь був о. Ярослав тогды іщі лем штудент, приятый на Кіріломефодійску факулту.

• *Сприятеліли съте ся такой?*

– Такой. Ярослав любив церьковнославянський язык і обряд, знав по русиньскы а сміло ся голосив ку Русинам. На факулту був в тім року приятый і родак зо Свідника о. Мілан Біланчік, штудент того самого духа як о. Ярослав. Попросив єм їх, жебы ня учили по русиньскы, што они з охотов робили цілый рік.

• *Яка была тогды ситуація в семінарії?*

– Професор о. Бобак нас вів ід любви ку церьковнославянському языку, а не був за словацький літургічний язык. По ёго смерти ся професором літургіки став о. Штефан Уйгелі. Він зачав учіти і по словацькы, а словацьку літургію завів і до братіславской церькви. Самособов, тот тренд був ініційований церьковнов єрархієв в Пряшові. Найвекшым аргументом было, же треба служыти і так, і так. То значіть – і Русинам і Словакам.

• *Но Русинам не по русиньскы, но лем церьковнославянскы?*

– Так, кедь дахто з Русинів спомянув, же Русины бы мали мати по русиньскы, розорвав ся над ним міх аргументів, же русиньський язык є лем діалект, не є кодифікований, мать слабу терміноло-

ОБСЯГ

| | |
|--|----|
| Председа Общества св. Йоана Крестителя о. ЯРОСЛАВ ПОПОВЕЦЬ ославив 60-ку | 1 |
| Свідчитель віры і писатель ОСИФ КУДЗЕЙ одсвятковав 70-ы народенины | 3 |
| Проф. Др. Павел Роберт МАГОЧІЙ: Припомянули сьме собі 290 років народжіня і 250 років смерти єпископа ІОАННА БРАДАЧА | 5 |
| Проф. Др. Іван ПОП, к. н.: Припомянули сьме собі 135 років од народжіня сполоченьского діятеля АЛЕКСАНДРА БЕСКИДА | 6 |
| Мгр. Марек Гай, ПгД.: Формованя ідентіты і сполоченьского статусу Русинів на переломі 19. і 20. стороча | 7 |
| ВЫШОВ ПРИРУЧНИК КУ ВЖЫВАНЮ РУСИНЬСКОГО ЯЗЫКА В СЛОВАЦЬКІЙ РЕПУБЛІЦІ | 10 |
| Мгр. Михал ПАВЛІЧ, ПгД.: ПОЗДРАЛІНЯ РУСИНІВ на рік 2022 ч. 2 | 13 |
| Штефан Смолей: І наш край прекрасный, Краю наш прекрасный, Ту є мое місто, Не забудь!, Споминаня на домовину, Просьба за бідны діточкы, Дякую ті, мамко | 13 |
| Марія Гірова-Васькова: Родна земля, Найдорогша мати, Наша планета, Послідній одказ, Чеканя на телефон | 15 |
| Людміла Шандалова: Нянічку в небі, Прошу Тебе, Боже, Ангеличку мій, Бы-м ся не бояла, У твоім світлі, За своїх, Кланям ся тобі, Душа моя | 16 |
| Осиф Кудзей: Популярность, Вызнаня, Крітіка, Фантом, Староновина, Різіко, Заосталость, Текст | 18 |
| Юрко Харитун: Мої жалі | 19 |
| Гаврііл КОЛЕСАР: НАШ РУСКИ ЯЗЫК У ШВЕТОВИМ РЕГІСТРУ ЯЗЫКОХ | 23 |
| Мгр. Михал ПАВЛІЧ, ПгД.: ДУХОВНА ПОЕЗІЯ ЛЮДМІЛЫ ШАНДАЛОВОЙ (2) | 23 |
| Споминаме на русиньского вытварного умельця АНДРІЯ ГАЯ, котрый бы ся недавно дожив 90 років | 25 |
| Припоминаме сі 90 років од народжіня а 15 років од смерти русиньского умельця ЮРІЯ КРЕСИЛЫ | 26 |
| Председа Народной рады Русинів Закарпатя ЄВГЕН ЖУПАН: „Нихто не може підтримовати агресора!“ | 27 |
| Выголошіня ОСРС односно ситуації на Україні | 28 |
| Выголошіня Світовой рады Русинів ку ситуації на Україні | 28 |
| Проф. Др. Павел Роберт МАГОЧІЙ: Америцький русиньський вістник був заснований перед 130 роками | 29 |
| Споминаме на ЮРІЯ КОСТЮКА – з нагоды 110 років од народжіня | 29 |
| Мгр. Петро МЕДВІДЬ: Припоминаме собі 55 років од смерти Грігорія-Ігнатія ЖАТКОВІЧА – першого губернатора Підкарпатской Руси | 30 |
| Проф. Др. Павел Роберт МАГОЧІЙ: Юбілующій науковець, професор ПЕТЕР ШВОРЦ | 32 |
| Юбілей професора ГЕНРИКА ФОНТАНЬСКОГО | 32 |



• Главны протагоністы Дяковной Службы Божой за 60 років жывога о. Ярослава Поповця дня 12. януара 2022 в Нягові: (зліва) о. Ігор Панчак, о. Володимір Панчак, п. Марта Поповцева, о. Методій Біланчак, ЧСВВ, о. Ярослав Поповець, о. Мартін Костілюк, о. Франтішек Крайняк, о. Іван Барна і о. Мілан Ясик.

гію, є вулгарный, не дасть ся ним проповідати на уровни і так подобні... Отець Ярослав тото вшытко зазнав на своїй скорі.

• **Тото тримало довгы roky.**

– Дакотры нежычливиці так аргументують доднесь.

• **Знаме, же уж в р. 1981 съте ся пустили до першых русиньскых перекладів. Мав на них частку і о. Ярослав?**

– Отець Ярослав похопив потребу русиньского языка в пасторації і цілый жывог ся тримав той потреби. Были съме все в контактї. В році 1981 ем був даный на парохію до Рокытова коло Гуменного. Там ем зоставив малый грекокатолицькый катехізм про русиньскы діти. Тот першы катехізм ем дав сконтрولهвати богословам – Ярославови Поповцеві і Міланови Біланчикови. Ілустрації до нёго зробив наш приятель в Братіславі Владимир Бабіц. В році 1984, кедь ем ся вернув із закаладной воєньской службы, съме тот Катехізм з Осифом Кудзеём доповнили а пустили ся до перекладаня Апостолів, Євангелії, Тайн. Отець Ярослав був высвяченый в році 1985. Од самого початку своєї священницькой службы був з нами в контактї, живо

ся інтересовав о переклады, дакотры терміны з нами конзултовав а в пасторації хосновав вшытко, што было переложене. Так то робить доднесь.

• **Знаме, же о. Ярослав ся занимав писанём ікон.**

– Занимав і занимать. Писати іконы зачав уж на першій парохії в Крайній Быстрій. Тот дар од Господа Бога красно розвинув а днесь видиме ёго іконы і в оригінальній формі дереворізеб. Окрем того, много років, уж за часів тоталіты, оправлёвав деревяны церькви і їх стародавны іконы і девоціоналії. Він і пан Михал Кость з Ладомировой в р. 1999 основали організацію „Záchrana a obnova Národnej kultúrnej pamiatky – Drevené chrámy pod Duklou“. Отець Ярослав Русинам і днесь захранює дорогоцінності матеріалны і духовны.

• **Не мав то легке.**

– Ні, а ани не мать, бо іщі все не є серьёзно вирішена проблематика русиньской пасторації. Хоць русиньскый язык є кодифікованый од року 1995 а церьковны переклады суть зроблены од Крещія аж по погріб, охота компетентных прияти русиньскый язык як літургічний є барз

спомалена. Но віримо, же ся дочекаме справедливости, а Русинам ся рівноцінно дасть того, што їм належить.

• **Отець Ярослав в своїм душпастырськім діяльності быв на трьох парохіях. Як ёго пасторацію видите вы?**

– Было бы то на єдну грубу книгу. Істе є, же всягды, де о. Ярослав пасторовав, парохія духовно міцніла, церьков была про вірників оазов покоя, меджі людми была гармонія, покій, радість з віры. Самособов, же в ёго жывоті были і тяжкы сітуації, но він жывов віров перемагав вшыткы напасти лукавого, а зістав вірній своєму сумліню і народу. Нераз му в ёго душпастырськім

намаганю нежычливці вырвали весла з рук, но він весловав дале своїма руками, а звірену лодьку не охабив.

• **А чудуй ся, світе, русиньска лодька плавать істо допереду...**

– Плавають, бо єй керователём є сам Хрістос.

• **Жычіме о. Ярославови ку ёго 60-ці много здравя і Божого благословліня на многая і благая літа.**

– Няй Господь Бог выслухать вашу просьбу.

Здрой: Grekokatolic'kyj rusiňskij kalendar' / Грекокатолицькый русиньскый календарь 2022

Свідчітель віры і писатель ОСИФ КУДЗЕЙ одсвятковав 70-ы народенины

Народив ся 24. 2. 1952 в Нягові, де пережив цїлый свій жывот, де творив і де жыє донесь.

Богабойны родічі му заскіпили до сердца віру в Господа Бога, котрой ся вірно тримав в молодости і тримле ся в старобі, а котра про нёго была жрідлом хрістіаньского жывота. Як молодой хлопець в 1968 р. витав перед нягівським храмом своїма першыма стишками владыку Гопка. Дух віры го провадив по-

час цїлого жывота, іншпіровав го народно і релігійно. О ёго літературнім красотворію красно пише русиньска писателька ПгДр. Марія Мальцовска в книзі Осифа Кудзея – *Байкарёвы думкы* (2009) і рецензентка ёго зборника баёк *Мудрость жывота* (2008) ПгДр. Кветослава Копорова.



• Двоми перекладателі релігійной літературы із церьковнославянського языка до русиньского літературного языка на Словакії: (справа) Осиф Кудзей і о. Франтішек Крайняк при презентації книжкы *Байкы-забавлякы* О. Кудзея в Пряшові.

Сам автор дакотры удалости свого жывота описав в саморефлексії „Моя сповідь“ в книжках *Байкы-забавляйки (2008)* і *Пацеркы (2008)*. Аматерьскому театру в Нягові присвятив 15 років свого жывота. Ёго народны стишкы вышли в 10-ёх книжках (Позн. часопису Русин: до року 2022 авторови вышло уже до двох десятков книжок).

В р. 1981 го навщівив священник парохії Рокытів коло Гуменного о. Франтішек Крайняк. Бісїдовали о потребі перекладу церковных літургічных книг з церковно-славянського языка до языка русиньского.

Редакція Русиньского грекокатолицького календаря 2022 ся о. Франтішка позвідовала на дакотры інтересны моменты з їх зознамлїня ся і сполочного перекладаня церковных текстів.

• **Отче Франтішку, де сьте ся першыї раз спознали з Осифом Кудзеєм?**

– В році 1981 єм ся став душпастырём парохії Рокытів коло Гуменного. В Нягові єм мав доброго приятеля з теологічных штудій – Сергея Сметанку. Він знав о моїх пасторачных поглядах, же каждый народ бы мав мати богослужіня в материньскім языку, а так як мають Мадяры по мадярськы, Словаци по словацькы, Українці по українськы, так мають мати і Русины по русиньскы. Сергей мене завів ку Осифови Кудзеєви, котрый писав стишкы по русиньскы а про аматерьський театрик в Нягові писав по русиньскы песы. Кедь єм му повів о задумі русиньских церковных перекладів, думка ся му любила і притакнув, же ся треба до того пустити. То ся і стало, кедь єм ся вернув із закладной воєньской службы в році 1984. Самоперше сьме оправили Малыї грекокатолицькый катехізм про русиньскы діти, котрый єм уж мав написаний за помочи богословів – Ярослава Поповця і Мілана Біланчіка. Потім сьме ся пустили до перекладаня Апостолів і Євангелій на неділі і свята цілого року.

• **То было іщі перед революцієв.**

– Так є. В році 1985 мене отець ордінарь Йоан Гірка переложыв на парохію до Меджілаборець. Ту сьме переложыли Тайны: Крещіня, Міропозазаня і Вінчанку, тыж Молитеву св. Ружанця а Крестну дорогу.

• **Потім пришов рік 1989.**

– Так. А по нїм в р. 1995 кодифікація русиньского языка. Перед кодифікацієв сьме мали властну граматічну норму, но од р. 1995 сьме прияли офіціалну норму установлену Інштїтутом русиньского языка і културы Пряшівской універзіты в Пряшові. Можу повісти, же много оправлєвати не требало.

• **Потім наслідовали остатні переклады.**

– Гей. Днесь можеме повісти, же маме переложене вшытко потребне про пасторацію русиньских вірників, од крещіня аж по погріб. Найвеце собі ціниме переклад Малого требника, Недільной вечурні, Літургії оперед посвяченых дарів, Літургії Йоана Златоустого, комплетного Нового завіта. Остатнім нашым ділом є Молитвенник, в котрім ся находять тропарі і кондакы на цілый рік, молебены, акафісты, ружанці, духовны пісні.

• **Є то велике діло. Таке не зробив ани Духновіч.**

– Є то правда. Кедь ся споминають народны будителі Духновіч і Павловіч, я бы ку ним додав і Кудзея. (Позн. часопису Русин: але тыж у першім рядї і о. Франтішка Крайняка).

• **Часто сьме де-кого чули, же до русиньского языка ся не дасть якостно перекладати, бо язык не мать достаток потребных слов, же русиньска реч є бідна.**

– Бідна не є, лем не є розвинута. Русины не мають свою державу, де бы тот процес ся наповно розвинув через школство, медіи, інштїтуції, денно-денне навчаня русиньского языка з позіції авторіты державы. У Русинів як бездержавного народа є то вшытко добровольне. Мы сьме тыж мусили розвинути теологічну термінологію, требало вытворити із уже ествуючїх слов – новоформы. Так ся то робить в каждыйм языку. Особно собі думам, же термінологію Нового завіта сьме розвинули пребогато і прецізно. А што ся тыкать Літургії Йоана Златоустого, з перекладу бы собі могли брати приклад і іншы языкы. Но покорно собі усвідомлюєме, же ани нашы переклады не суть доконалы.

• **Мать на перекладах частку і Інштїтут русиньского языка і културы?**

– Мать. Множество слов сьме переконзултовали з доцентков Аннов Плішковов. Вшыткы

переложены книжки сьме засылали на Іншітут русиньского языка і клултуры Пряшівской універзіты. Но мушу припомянути, же отцём церьковных перекладів є Осиф. Є то ёго язык, ёго штїл, ёго філологічне красотворїня. Коло Осифа русиньскый язык ся учїв і я, бісїдую так, як мене научїв Осиф. На церьковны тексты ем ся заміряв теологічно. Ем пересвідченый, же в них не є нияка теологічна хыба.

• Мать русиньскый літургічний язык будучность?

– Ем пересвідченый, же мать. Тадь зато сьме 40 років робили тоты переклады, жебы ся хосновали і служыли духовным потребам віруючих. В церьквах на русиньских селах ани не пасує іншакый язык як церьковнославянський і русиньскый, котры народу не ніщать ани народну ідентіту, ани ёго културне богатство. Но одповідность несе і верхность Грекокатолицькой

і Православной церькви. Ниякым способом бы не мала Русинам бранити мати церьковны обряды по русиньскы. Кедь ся так не стане, буде то велика културна і релігійна шкода, народностный грїх і пасторачна хыба.

• На чім ся робить теперь?

– На коректурі комплетного Нового завіта. Віриме, же в близкій добі го будеме мочі понукнути нашым вірникам.

• Жычіме Осифови ку ёго 70-ці много здравя і Божого благословліня на многая і благая літа.

– Няй Господь Бог выслухать вашу просьбу.

Здрой: Grekokatolic'kyj rusiňskyj kalendar' / Грекокатолицькый русиньскый календарь 2022

Проф. Др. Павел Роберт МАГОЧІЙ, Торонтська універзіта, Канада

Припомянули сьме собі 290 років народжіня і 250 років смерти єпископа ІОАННА БРАДАЧА

Іоанн Брадач (Bradacs Ioannes) нар. 14. 2. 1732 у Торисках тогдышнёго Угорьского кралёвства, теперь на теріторії Словакії, умер 4. 7. 1772 у Мукачові тогдышнёго Угорьского кралёвства, теперь на теріторії України. Быв василіаньским монахом-священником, педагогом і церьковным ерархом на Підкарпатьській Руси.

По скончіню гімназії у Спішській капітулі і Левочі І. Брадач здобыв теологічу освіту в Тьрнавській албертінській колегії. Быв высвяченый на грекокатолицького священника (1755) і служыв у парохії Росвигова (теперь часть Мукачова), учїв у Мукачовській богословській школі. У 1760 р. був менованый архідіаконом Мукачовского катедрального собору а о два рокы пізніше – інспектором архіалных школ. В тім часі Мукачовска грекокатолицька епархія была під юрисдікцієв римокатолицького єпископа Ягра. Намагаючі ся змінити сітуацію, у 1764 р. Епархіална сінода посылає І. Брадача з „дїпломатічнов“ місієв до влады Габсбургской імерії у Відні з цілём канонічного узнаня і юридічного одокремліня Мукачовской епархії од римокатолицькой епархії Ягра. Почас тых переговорів І. Брадач (на фотці зверьху) здобыв тітул єпископа (1768), але Мукачовска епархія zdobyла статус незалежной адміністратівно-церьковной єдніці лем у



1771 р. І. Брадач тыж зоставив і опубліковав про школярїв русиньских школ „Букварь или руководіе хотящїм оучитися письмены руско-славянскими книгамъ“ (1770, перевыданный в р. 1982, на фотці зверьху). Затоже букварь был основанный на книгах подобного характеру выданных выходов (православнов)

церковлєв, подля думкы цензора букварь мав проявы „схизмы“ (православїя). З той причіны імпереторка Марія Терезія приказала цілый тіраж букваря сконфішквати і спалити (заховали ся лем три екземпларї). Єпіскоп тыж зоставив зборник молитв („зборникъ“), якый тыж був оснований на выходнім моделі. Обвинений з невірности католицькій догмі, І. Брадач мусив прияти присягу „на узнання віры“. Тото вшытко мало негатівный вплив на ёго здравя і выкликало предчасну смерть.

Література: Ю. Жатковичъ, „Іоаннъ Брадач: єпіскоп Мукачевской“, in *Мѣсяцословъ на 1898 годъ* (Ужгород, 1899), с. 41-44; А. Pekar, Bishop John Bradač: the Last Basilian in the Mukačevo Episcopal See“, *Orientalia Christiana Periodica*, XLIX, I (Roma, 1983) pp. 130-152.

Здрой: „Енциклопедія історії та культури карпатських русинів“ зоставителїв П. Р. Магочія і І. Попа, Ужгород: Видавництво В. Падяка, 2010, с. 68-69, переклад із українського языка: А. З.

Проф. Др. Іван ПОП, к. н., Хеб, Чесько

Припомянули сьме собі 135 років од народжіня сплоченьского діятеля АЛЕКСАНДРА БЕСКИДА

Александр Бескид (Олександр Бескид, Александръ Бескидъ, Alexander Beskid) нар. ся 15. 1. 1887 в Абауйсанто тогдышнёго Угорьского кралєвства, теперь на теріторії Мадярьска, умер 24. 11. 1975 у Кошіцях тогдышнёй Чехословакїї, теперь на теріторії Словакїї. Быв адвокатом, штатным урядником і сплоченьским діятелєм меджі Русинами Пряшівской области і Підкарпатьской Руси.

А. Бескид ся учів у гімназіях в Кежмарку в Пряшівській области і в Будапешті, потім наступив на штудії на Правницьку факулту Будапештської універзїты (доктор права і доктор філозофїї, 1912). Робив як школьскый інспектор у Дебрецині в Мадярьску (1912 – 1919) і на Підкарпатьській Руси (1919 – 1924) по ей припоїню ку Чехословакїї. Знамый був як чоловік високих принципів. Тоты прїнципы дотримовав передовшыткым як сплоченьскый діятель, незалежно од того, же ёго стрыко, Антоній Бескид, був у функції губернатора Підкарпатьской Руси (1923).

У 1924 – 1938 роках А. Бескид служыв як началник реферату про вопросы культуры, освіти і релїгїї Підкарпатьской Руси. Снажив ся о розвой театру, пропаговав толерантность в меджірелїгійных одношінях. Хоць був віруючим грекокатолицькой церкви, помагав створити єпархію і дієцезію про православных і євангелічных хрістіан на Підкарпатьській Руси; ёго часто просили о поміч у вирішіню конфліктів меджі ортодокснума і неортодокснума Жыдами. У языковім сперечаню меджі русофілами, русинофілами і українофілами, котре стало інтензівніше по 1936 р., А. Бескид занимав неутралну позицію, зістав активным прихыленцєм вірности Чехословакїї. Ёго кандидатура на функцію



віцегубернатора, яку традично обсаджовали Чехы, спочатку была одсунута президентом Е. Бенешом (септембер 1938). Лем по Мніховскім

пакті Александер Бескид був менований за віцегубернатора (1. 10. 1938), хочь в тім часі чехословацьке веджіня было в повній мірі замінене автономным підкарпатським урядом (11. 10. 1938). Доконця в тих новых условиях А. Бескид повнив задачі віцегубернатора почас дакількох тыжднів. По вирішалнім переформованю федеративной Чехословакії (1939) А. Бескид пришов до Пряшова і понукнув свої службы словацькому штату. Кедь дістав негатівну одповідь, перешов до Кошіць, котры тогды были частёв Мадярьска, де перебув войновы часы. У 1945 р. робив короткий час у державній службі за обновліня Чехословакії, потім ся скоро на

три десятироча став легковажним позорвателём жывота і комуністичного режиму.

Література: Stanislav Konečný, „Aleksander Beskid a Podkarpatská Rus do roku 1939“, in: Miroslav Balcar, ed., *Vznik ČSR 1918 a Podkarpatská Rus* (Praha, 1999), s. 74-86; Stanislav Konečný, „A. Beskyd a politický vývoj na Podkarpatskej Rusi v druhej polovici tridsiatych rokov“, in: Mikuláš Mušinka, ed. *Zakarpatská Ukrajina v rámci Československa, 1919-1939* (Prešov, 2000), s. 215-222.

Здрой: „Енциклопедія історії та культури карпатських русинів“ зоставителів П. Р. Марочія і І. Попа. Ужгород: „Видавництво В. Падяка“, 2010, с. 50-51, переклад з українського языка: А. З.

Мгр. Марек Гай, ПгД., учитель професійного розвитку про русинський язык і літературу, Крайский методічно-педагогічний центр в Пряшові.

Формованя ідентіты і сполоченьского статусу Русинів на переломі 19. і 20. стороча

Културне оброджіня Русинів другой половины 19. стороча під веджінем Александра Духновіча і Александра Павловича помогло заховати усвідомліня русиньской народной ідентіты. І наперек тому ся в тім часі Русинам не подарило здобыти будьяку подобу автономії або здобыти стабільный народностный статус в рамках народів жыючих в Угорьскім кралёвстві. Десятироча по року 1867 было про Русинів окреме тяжке. Были то часы, коли угорьска влада реалізовала політику тотальной мадярізації з намірінём асіміловати народностны меншыны і перемінити їх на народно усвідомленых Мадярів. В наслідку того угорьска влада заказала діятельство русиньских културных обществ і поступно сістематічно еліміновала і навчаня русиньского языка у векшыні основных школ.

Конець 19. і початок 20. стороча ся в Австро-Угорьску цілодержавно ніс в духу міцного народностного утиску і насильной мадярізації у вшытких сферах. Што ся тыкать школства, за найнегатівніше можеме поважовати імплементацію школьского закона грофа Алберта Апонія (1907), котрого главным цілём было сістематічно мадярізовати школованя немадярьских школярів.

Закон учітелім наказав будовати у школярів чутя приналежности ку мадярьскому народу і школы ся так стали найефективнішим, і заед-

но законным інструментом асімілачной політики. Вшыткы писаны педагогічны матеріалы ся вели в мадярьскім языку. Тота судьба постигла і навчаня русиньского языка. Тогдышній став можеме подробніше аналізувати на основі слідуючих фактів. **Од року 1874 ся на території выходной Словакії по русиньскы учіло в 247 школах, но рік 1907 був якраз тым, коли ся поступно змінив їх навчальный язык на мадярьский.** Кедь бы сьме слідовати штатістікы з наступных років 1907 – 1912, спознаме, же сітуація ся змінила. На початку запроваджіня закона Апонія ся іщі на 68 школах учіло білінгвално (мадярьско-русиньскы), но поступно ся дочіста помадярьчили. Поменшало нелем чісло школ з послідніх 23 на 9, але поступно ся редуковали і розмаїты алтернатівы і формы навчаня в русиньскім языку. Перед початком Першой світової войны народностный жывет Русинів в Австро-Угорьску упав на найнизшу уровень у своїй історії. В будьякім прояві славянського усвідомліня віділа влада небезпеченство, зато пронаслідовала грекокатоликів, котры конвертовали на православіе. Русиньскы призви́ска, але і родны мена были в документах змінены на мадярьскы. В наслідку такого намаганя угорьской влады много Русинів, найвеце із рядів інтелігенції (учітелі, грекокатолицькы священници) ся чудесно „перемінило“ на зановных угорьских патріотів.

Парадоксно якраз наступны турбулентны історичны події по року 1914 змірили тяжку судьбу дакотрых меншых народів і народностей мултікультурного но в мінорітній політіці некомпромісного Австро-Угорьска.

Почас войновых років тісячі Русинів оддано служыли в австро-угорьській армаді. Много їх умерло або утерпіло раны на выходнім фронті або на смертоносных полях северной Італії. В тім часі ся меджі вояками русиньского походжія шырила думка о потребі соціальных і політічных змін, котра тогды тяжыла Австро-Угорьско і векшыну европского контіненту. Ёй практічным проявом была наконець революція в році 1917 в Росії. Войновы roky принесли про Русинів і далшу велику трагедію. Од септембра 1914 до яри 1915 бівша часть габсбургской Буковины і Галічі, враховано русиньской теріторії была окупована Росієв. В часі офензівы і наступного одходу російських войск габсбургскы уряды арештовали дакілько тісяч Русинів, котрых обвинили зо шпігунства і з колаборації з Росієв. Арештованых посылали до концентрачных таборів, із котрых найгіршу репутацію мав Талергоф недалеко міста Грац в Австрії. Лем малохто днесь уж знать, же першы концентрачный лагер в історії середній Европы бив габсбургсков владов зряджений праві з тым намірінём. Арештованых было, окрем інших, і скоро 2000 русиньских інтелектуалів – грекокатолицьких і православных священників, учітелів, освітніх діятелів, але і много простых селян, котры ся поставили будьяков формов проти неправостям тогдышнёго політічного зряджінія. Многы із них умерли в наслідку арештованія і з тым споєным голодом і хворотами. Так політічно, сполоченьскы і ідеологічно утискованый русиньскый народ пережыв і тоты тяжкы часы, а по войні ся конечні зачало розвидняти на лішпы часы...

По скончіню Першой світової войны в новембрі 1918 Австро-Угорьско перестало ествовати. Вопрос вирішінія інтеграції Русинів в рамках державотворного намаганя ся наступницьких держав зачала ініціювати русиньска іміграція в Америці. Вопрос рішінія політічної будучности своєї русиньской отцёвціны русиньска іміграція зачала актівно отворяти уж концём року 1917 і на зачатку року 1918. *Америцька народна рада Угросинів* отворено пожадує припоїня Карпатьской Руси – русиньской дідовизны, ку формуячій ся Чехословакіі.

Під веджінём америцького адвоката русиньского походжія Грігорія Жатковіча наконець підпорили думку автономной „русиньской державы“ в рамках Чехословакіі. Пропозіції Русинів ся цалком не наповнили, бо Чехословакія рішыла намісто федеральной справы аплікувати централизованый модел. Президент і основатель новой державы Томаш Гарік Масарік Русинам потвердив право на самосправу, в наслідку чого ся на політічній мапі Чехословакіі обявила нова провінція під назвов Підкарпатьска Русь з окремым ступнём саморяджінія, ці автономії, гарантованой меджінародными договорами (Ст. Жермен – 1919, Тріанон – 1920) і конштитуцієв Чехословакіі (1920). Русины жыючі на северовыході Словакіі ся тогды основанём Чехословакіі стали єднов із державных народностей. На розділ од Русинів –жытелів Підкарпатьской Руси, Русины на Словакіі в тім часі не мали штатут „державотворного народа“. Были триманы лем за міноріту, котра мала у звязи з конштитуцієв окремы права на хоснованя материньского русиньского языка в рамках школства і в сполоченьскім жывоті, а таксамо мали право на пропагованя русиньской культуры. Напрямом ку тій групі жытельства і в рамках новооснованой державы ся формовало дакілько змін.

Перша ся дотуляла окреме політічної полемікы зьєдночінія теріторії выходной Словакіі заселеной Русинами з Підкарпатьсков Русєв. Самособов, раховало ся з тым, же у звязи з тым фактом ся Русины не выгнуть конфліктам у вопросах політічної лояльности і навчалного языка на школах з ту жыючіма Словаками, што ся веце-менше і скоро потвердило. Далшым гендікепом той группы жытельства была дуже плана економічна сітуація. Русины навшыше ани в часі другой декады 20. стороча не мали дефінітівно вирішений вопрос властной народной ідентіты, што было наслідком факту, же теріторія, на котрій жыли (тзв. Карпатьска Русь), была по розпаді Австро-Угорьска розділена меджі наступницькы державы – Чехословакію, Польско, Румунію і Мадярьско. Наперек комплікованій сітуації в політічній і економічній сфері можеме конштатовати, же в меджівойновім періоді доходить ку зліпшіню сітуації, главно в школстві. Видить ся, же протесты *Руськой народной партії* і пряшівского грекокатолицького епіскопства, як і новооснованого *Русиньского народного выборы* (1937) мали позітівный

вплив і на проблематику освіти. В році 1931, на початку другого десятиріччя чехословацької влади, було на северовихідній Словакії лем 111 основних школ, в котрых ся учів у даякій формі русинський язык. Наслідно тогдышне міністерство школства поволило на 59 основних школах, де ся дотогды учіло в словацькім языку, жебы таксамо учіли і в русиньскім языку. Зарівно на далшых 43 основних школах было заведжене навчання русиньского языка мінімално на 3 години тыжденно. В році 1938, курто перед початком Другой світової войны, уж єствовало 213 основних школ, де був русинський язык навчалным языком (170), або ся в них учіло в русиньскім языку дакілько предметів (43).

Главне поставліня в освіті Русинів в тых часах мало церьковне школство. Окреме важнов частєв пасторації грекокатолицького пряшівського єпископа, блаженого Павла Гойдіча, ЧСВВ був і розвиток церьковного школства. В меджівойнових часах єствовали в рамках Грекокатолицької церькви школы вшитких трєх ступнів школованя – основны (простонародны, людовы), середні (тзв. „мала семінарія“ Грекокатолицької богословской семінарії) і высокы (тзв. „велика семінарія“ Грекокатолицької богословской семінарії). На основі інформацій із схематизму з року 1931 было на теріторії єпископства 167 народных школ, причім державных народных школ было в тім просторі лем 24. І на тім порівнаню є явна ініціатива блаженого єпископа Гойдіча у сфері церьковного школства.

Дефінітивне рішєня русиньского языкового вопросу на Словакії в меджівойнових часах было позначене незлагодов і традично неєднотностєв інтелігенції. Пропоновали ся мінімално 3 концепції, або ліпше повіджене, напярмы односно проблематікы єднотного фіналного літературного языка про Русинів – карпаторуський, руський і русиньский. Самособов найсилнішов фракцієв був русиньский напрям. **Запроваджаня русиньского языка до вшитких сполоченьских сфер, главно школства, найвеце підпоровало грекокатолицьке єпископство.**

Вызначным кроком блаженого єпископа Гойдіча ся стало намаганя о штандартізацію літературного языка про Русинів, подля котрого ся мало учіти в церьковных школах. Єпис-

копским писмом ся обернув на *Реферат Міністерства школства і народной освіти* в Братіславі в році 1930, в котрім жадав о доволіня учіти в тзв. карпаторуськім языку. Быв то руський язык доповнений многыма діалектізмами, у высловности ся хосновали містны формы, засоба слов походила із російского языка і з містного говорювого языка, граматічны правила з російского а часточно і українського языка, враховано многых містных архаічных форм і суфіксів. Блажений єпископ Гойдіч ся наслідно в проблематіці зміны навчалного языка обернув і на *Міністерство школства ЧР* у Празі а два раз і на президента Т. Г. Масаріка – писмами із 14. марца 1932 і з 26. юна 1934. Негативны реакції єпископовых нежычливців із кругів грекокатоликів словацької народности на тоты активіты на себе не охабили довго чекати. Єпископа грубо обвинили із сепаратістичных активіт і з намаганя ся о тоталне порусинізованя грекокатолицького церьковного школства. Віділи за тым задум єднак порусинізувати словацьких грекокатоликів, но і ініціативы ку одторгнутю дакотрых країв выходной Словакії і їх припоїня ку Підкарпатській Русі. Активіты русиньских церьковных і політичных кругів в тім вопросі были імпульзом про активованя сполку *Словацька ліга*. Од року 1932 ся тот зачав інтензівно інтересовати конфліктом меджі блаженым єпископом Гойдічом і представителями словацьких грекокатоликів. Порады і конгресы *Словацької ліги* односно вопросу рішєня русиньско-словацьких спорів в рамках Грекокатолицької церькви акцентували окреме потребу зряджіня самобытного єпископства про словацьких грекокатоликів, котрого єпархіалны граніці бы ся мали перекривати з країнськыма. К наповніню пописаного намаганя наконець нігда не дішло, але наспак, папа Піус XII. блаженого єпископа Гойдіча в році 1940 мєновав за єпархіального пряшівського єпископа, бо дотогды був лем апостольским адміністратором пряшівського єпископства. Словацько-русиньскы одношіня в рамках Грекокатолицької церькви так зістали і надале выострєны і нерішены. Блажений єпископ Гойдіч був отвореным застанцєм самобытности русиньского народа, свої активіты в ділах справы єпископства, выховы і освіти в условиях організованого церьковного школства напярмив ку комплексній стимуляції статусу Русинів на выходній Словакії. Правом го зато мож

тримати за найвизначнішу особність русиньського народностного руху першої половини 20. стороча.

Меджівойновы часы принесли в процесі ідентифікації, едукації і сполоченьского етаблованя Русинів Словакії наістно многопозітівів. Ровиток русиньского народностного школства нукав перспективну будучность. Але маразм Другой світової войны і наслідно наступ комуністичного тоталітного режиму концём 40-ых років 20 ст. на довгый час паралізовали далшы розвиток едукації Русинів, ба іщі веце, тоты події доцілили ёго абсолют-

ный заник. Політичны події координованой денаціоналізації (заказу приголосити ся ку русиньській народности) і декатолизації (заказу діятельства Грекокатолицькой церькви) Русинів у Чехословакії в 50-ых роках 20. ст. їм як єдиній народности на довгы рокы заперли двері в їх народно-усвідомлюючій процесі. Аж пізнішы удалости по нїжній революції наштартовали много позітивных змін в народностній політиці.

Здрой: Grekokatolic'kyj rusiňskij kalendar' / Грекокатолицькый русиньскый календарь 2022

ВЫШОВ ПРИРУЧНИК КУ ВЖЫВАНЮ РУСИНЬСКОГО ЯЗЫКА В СЛОВАЦЬКІЙ РЕПУБЛІЦІ

Європска харта регіональных або мінорітних языків завязує органы к тому, жебы нам створили можности на пожадованя і приїманя інформацій і служеб в русиньскім языку, а то так в устній, як і в писомній формі.

Європска харта регіональных або мінорітних языків є договором Рады Европы, котрый хранить і підпорує, окрем іншого, русиньскый язык в Словацкій републіці. Тот **языковий приручник** вас проведе установлїнями харты, котры Словацка републіка повинна дотримовати в одношіню к русиньскому языку. Словацка републіка ани Харта лем самы не можуть гарантовати захованя вашого языка. Главна одповідность лежить на Вас. Русиньскый язык в Словацкій републіці пережыє лем тогды, кедь го будете хосновати каждый день – і всягды. Бо єдно є істе: язык, котрым ся бісїдує лем дома, в кухни, скоріше або пізніше заникне. Зато не охабляйте Ваш язык лем дома: Тримайте ся Харты і хоснуйте вшыткы можности вжываня русиньского языка і мімо вашого дому! Вжывайте го – захраньте го!

ЦІЛІ І ПРИНЦЫПЫ

■ Словацка републіка в одношіню к русиньскому языку на теріторіях, де ся хоснує, свою політику, легіслатіву і практику, окрем іншого, будує на слїдуючіх цілях і прінципах:

- ▶ узнаня русиньского языка як прояву културного богатства;
- ▶ решпектованя географічної области русиньского языка так, жебы ествуюче або приготовлєване адміністратівне розділїня не по-

шкодило процес підпору того языка;

▶ потреба ясного поступу в процесі підпору русиньского языка з цілём ёго утриманя;

▶ злегшіня і/або підпора устного або писомного прояву в русиньскім языку в публічнім і пріватнім животі;

▶ утримованя і розвиваня контактів у сферах вызначеных хартов меджі групами хоснуючіма русиньскый язык і другыма групами жыючіма в штаті, котры хоснують язык в ідентічній або близкій формі, а тыж надвязаня културных контактів з другыма групами в штаті, котры хоснують інакшы языки;

▶ створїня адекватных форм і механізмів на навчаня і штудії русиньского языка на вшыткых вгодных ступнях;

▶ створїня выгод з цілём помочі особам, котры не знають русиньскый язык і жыють в области, де ся тот язык хоснує, жебы ся го могли навчїти, кедь проявлять інтерес;

▶ підпора адекватных форм меджінародной выміны у сферах, котры регулує тота харта про русиньскый язык, кедь ся хоснують в ідентічній або близкій формі в двох або веце штатах.

■ Словацка републіка ся завязує еліміновати, погы так іщі не зробила, вшыткы непідложены розділы, вынятки, окліщїня або выгоды в процесі хоснованя русиньского языка, котрых цілём є знеговати або



**ВЖЫВАЙТЕ ГО –
ЗАХРАНЬТЕ ГО!**

огрозити ёго утримованя і розвой. Приятя окремых кроків на хосен русиньского языка з цілём підтримати рівноправность меджі вжывателями того языка і другим жытельством, або кроків акцептуючих їх шпецифічны условия, не мож раховати за дискриміначны односно вжывателів розшыренішых языків.

■ Словацька република ся завязує підтримовати адекватныма средствами взаємне порозумліня меджі вшыткыма языковыма групамы в державі, а главно загорнути решпектованя, порозумліня і толеранцію к русиньскому языку до выховы і освіти реалізованой в штаті, а к уведженому приступу вести і масмедіі.

■ При формованю політики заміряной на русиньский язык буде Словацька република брати до увагы потреби і желаня настолены группамы, котры уведжений язык хоснують.

■ В припаді потреби можуть основати порадны органы, котры бы помагали штатным органам у вшыткых вопросах, котры ся дотыкають русиньского языка.

ОСВІТА

■ У сфері освіти Словацька република бере за свою повинность на теріторіях, де ся русиньский язык хоснує, подля сітуації того языка і без пошкоджіня навчаня штатного языка:

▶ забезпечіти, жебы переважна часть передшкольској выховы ся вела в русиньскім языку;

▶ забезпечіти, жебы переважна часть навчаня в основных школах ся вела в русиньскім языку;

▶ забезпечіти, жебы переважна часть навчаня в середніх школах ся вела в русиньскім языку;

▶ забезпечіти, жебы переважна часть навчаня в одборных школах ся вела в русиньскім языку;

▶ забезпечіти фінанції на штудіі русиньского языка як одборного предмету універзітного і другого високошкольској навчаня;

▶ забезпечіти, жебы ся русиньский язык став предметом навчаня про дорослых або інтегралнов частёв контінуалного навчаня; прияти крокы на забезпечіня навчаня історії і културы, котры бы мали вплив на русиньский язык;

- ▶ забезпечити основну і далшу освіту учителів потребных на реалізацію тых кроків;
- ▶ створити еден або веце контрольных органів компетентных контролєвати реалізацію приятых кроків і прогрес досягнутий в уводжованю або розвою навчання русиньского языка і виготовлїня періодічных справ о імплементації приятых кроків, котры будуть опублікованы.

СУДНИЦТВО

■ Словацька републіка ся завязує в судных раёнах, в котрых кількість вживателів русиньского языка жыючих на тій території дає право прияти ниже уведжены крокы, выходячі із ситуації того языка і за условия, же хоснованя можностей уведжены в тім абзацу не буде судця розуміти як барьеру в реалізації справедливой юрисдикції:

- ▶ в карнім процесі:
 - гарантовати обжалованому право хосновати русиньский язык, і/або
 - забезпечити, жебы ся жадости і доказы, писомны або устны, не брали за нерелевантны лем зато, бо были предложены в русиньскім языку.
- ▶ в цивільнім процесі:
 - забезпечити, будьколи кедь є участник повинный выступити на суді особно, жебы міг хосновати русиньский язык, а то без додаточного кельчіку про нёго, і/або
 - доволити предложити документи і доказы в русиньскім языку, кедь треба, то посередництвом тлумачників або перекладів.
- ▶ в процесі перед судами в справных ділах:
 - забезпечити, будьколи кедь є участник повинный выступити особно перед судом, жебы міг хосновати русиньский язык, а то без додаточного кельчіку про нёго, і/або
 - доволити предложити документи і доказы в русиньскім языку, кедь треба, то посередництвом тлумачників або перекладів.
- ▶ прияти крокы, котры забезпечать, же процедура в цивільнім і справнім процесі в русиньскім языку, предложіня документів і доказів в русиньскім языку і każde потребне выужытя тлумачників і перекладів не буде значіти новий кельчік про доткнуты особы.
- Словацька републіка ся завязує забезпечити доступ к найвызначнішым внутроштатным правовым нормам в русиньскім

языку і тым, котры ся дотуляють особ хоснуючих тот язык, кедь даны тексты не были доступны інакшым способом.

СПРАВНЫ ОРГАНЫ І ПОСПОЛНЫ СЛУЖБЫ

- На адміністративных територіях штату, де кількість ту жыючих вживателів русиньского языка дає право на приятя ниже уведжены кроків, і выходячі із ситуації того языка, Словацька републіка ся завязує, кедь є то може,
 - ▶ забезпечити, жебы вживателі русиньского языка могли предложити устны або писомны жадости і дістати одповідь у тім языку.
- Покры іде о містны і регіональны органы на території, де жыє така кількість вживателів русиньского языка, котра дає право прияти ниже уведжены крокы, Словацька републіка ся завязує забезпечити і/або підпорити:
 - ▶ можливість, жебы вживателі русиньского языка могли предложити устны або писомны жадости в тім языку;
 - ▶ опублікованя урядных документів регіональных органів таксамо в русиньскім языку;
 - ▶ опублікованя урядных документів містных органів таксамо в русиньскім языку;
 - ▶ хоснованя русиньского языка на засіданях містных органів, причім можнось хоснованя штатного языка зістає захована;
 - ▶ хоснованя або перебераня традичных і справных містных назв у русиньскім языку, а кедь треба, то ведно із назвами в штатнім языку.
- З оглядом на посполны службы (наприклад, вода і газ, одпад і гігієна, телефонны службы, публічний транспорт, цінтері, бібліотеки, шпортовы центры, забавны центры) реалізованы справными органами або нима уповномоченыма іншыма особами Словацька републіка ся завязує на територіях, де ся хоснує русиньский язык, в залежности од ёго статусу і покы є то може:
 - ▶ доволити вживателям русиньского языка предложити жадость в тім языку.
- З цілём імплементації высше уведжены установлїня Словацька републіка ся завязує прияти еден або веце із слідуячих кроків:
 - ▶ забезпечити пожадованый переклад або тлумачіня, кедь ся пожадують;

(Продовжіня на 21. стор.)

ПОЗДРАВЛІНЯ РУСИНІВ на рік 2022 ч. 2

Дорогы читателі,

при погляді на удалости послідніх років ся не мож убранити думці, же 21. століття не буде про людство легкым. Од природных катастроф, пандемії аж по теперішню страшну войну на Україні. Што далше іщі принесе будучность, то нихто не знать, є але істым, же нас чекать іщі много скушок. А єднов з найважніших в сучасности переходить Україна.

Рихтовати літературу до другого Поздравліня з оглядом на сучасну войнову сітуацію про мене не было легков задачов. А хоць каждую рубріку єм дотеперь прімарні адресовав Русинам, днешня є єднозначно венована і вшыткым терплячім на Україні.

Вірю в силу слова і літературы. Уж лем выповідженим словом можеме як помочи і потішыти, таксамо легко можеме ушкодити і ублизыти. Зато єм ся снажив до днешнёго Поздравліня выберати таку літературу, котра поглядить душу і утішить, одожене планы думкы і побавить. Выядрить любов ку своїй домовині, народу або просто к чоловікови, котрый бы му мав быти найблизшым – к матери. То вшытко єм глядав в творчости **Штефана Смолея, Марії Гіровой-Васьковой, Людмілы Шандаловой і Осифа Кудзея.**

Вірю тому, же русиньскы читателі ся о тоты позітивны годноты докажуть поділити з людми на Україні.

Мгр. Михал ПАВЛІЧ, ПгД., Центр языків і култур народностных меншын – Інштітуту русиньского языка і културы ПУ

Штефан Смолей

Не ганьб ся, Русине!

І наш край прекрасный

Велё з людей тужить
При морю сидіти
На плажах, і в морській
Воді ся мочіти.
Вогкым і соленым
Воздухом дыхати,
Шум вітру з морськыма
Волнами слухати.
Відіти як сонце
За море западять
Як холодный місяць
В морській воді плавають.

Тужба ся не сповнить,
Мы море не маме.
Од моря далеко
На суші бываеме.
Маме красны поля,
Лісы – як бы море,
В котрых ся потішить
І моє, і твоє,
І каждого сердце.

Хто раз до них зайде,
Істо в них про сердце
Потішіня найде.
Маме чісту воду
В преградах і в ріках,
Плажы місто піску
На зеленых луках.
Мож там посидіти,
Мож там полежати,
Чістый, свіжий водзух
До сыта дыхати.
Суть красны сонечны
Запады, выходы
В нашім краснім краю,
Хоць без морської воды.

І без моря наш край
Нам треба любити,
Хоць море не маме,
Добрі нам в нім жыти.
Прекасный є наш край
Нашой домовины,
Нашы горы, лісы,
Поля і долины.

Краю наш прекрасный

Бескіде наш, горы,
Краю наш прекрасный,
Дякуеме тобі
За наш жывот щастный.

Ту твої чудесны
Поля і долины,
Річки чістой воды,
Горы і рівнины.

Бо ту тыж твоїма
Горами, лісами,
Тот пахнячій воздух
Одмала сьме ссали.

Ту звучать прекрасны
Слова нашой мамы,
Давныма віками
Про нас сохранны.

Не даме їх взяти,
За ніч замінити,
Реч нашу няньківску
Будеме хранити.

Ту звучать найкрасшы
Нашы співаночки,
Їх співають стары,
І малы діточкы.

Летять, звучать они
Шырым нашым краём,
Потішають сердца
Вшыткым добрым людём.

Ту жыли наш отець,
Дідо і прадіды,
Ту, в тій нашій землі
Зістали іх сліды.
Схыль свою голову,
Клякний на коліна,
Поцілуй ту землю,
То наша Отчизна.

Бескіде наш, горы,
Краю наш прекрасный,
Дякуеме тобі
За наш жылот щастный.

Ту є моє місто

Де єсь? Роздумуєш?
Ці-сь на справнім місті?
Мушиш сам згадати,
Собі одповісти.
Ці-сь на справнім місті,
Там, де бы-сь мав быти,
В радости, але і в смутку
Все охотный жыти.

Я – на справнім місті.
Так думам. Я то знам.
Де єм ся народив,
Зістану навсе там.
Ту є моє місто,
В моім роднім краю,
Ту, на нашій землі.
Не забуду на ню.

Хоць не є богата
Земныма дарами,
Стою на ній певно
Своїма ногами.
Хоць і нашым предкам
Богатства не дала,
Но зато і про них

Їх роднов зістала.

Любили єй таку,
Яков про них была,
Хоць іх в іх жылоті
Скромненько кормила.
І они ту жыли
Аж до своєї смерти,
І я єй не могу
Зрадити, одперти.

Она і про мене
Моєв роднов землєв,
І про мене гріє
Сонце тепло над нєв.

Не забудь!

Жылот чоловіка красный,
Но мать велє подоб,
Про єго красу і добро
І ты сам дашто зроби.
Не чекай, же вшытко другы
Тобі мають дати,
Найдорогше уж ті дали
Твій отець і мати.
Істо ті дали, што могли
До жывота твого,
Добро, ласку, здравы руки –
Значить то так много.
Родічовске погладжія
Руков велє стоить,
О то веце, кедь є тогды,
Як ты дашто болить.

Не забывай, кадыль підеш
Ты своїм жылотом,
Ці іх стрітиш, ці обыйдеш,
Зохабиш під плотом?
Жылот чоловіка красный,
Знай го пережыти,
Не дай ся звести з дороги,
Котров бы-сь мав іти.
Треба тобі памятати,
Не треба забыти,
Без кого бы-сь на тім світі
Не жыв, не міг быти.
Раз ся застав в своїм згоні,
Постій, і подумай,
Ці єсь зробив вшытко,
што-сь мав,

Не забудь, не єсь сам!

Нескоро уж буде тобі
Слызы проливати,
Як не буде тых, кому-сь мав
За жылот честь дати.

Споминаня на домовину

Там, де в прекрасній долині,
Там, за плотом, на рівніні
Квіткы в траві росли
Потіхов мі были.
Де ня сонце скоро рано
Із спаня будило,
На постели із теплыма
Лучами гладило.
Де ня часто моя мамка
Руками гласкала,
Як малога на свою грудь
К собі притуляла.
Там зістала родна хыжа,
Моє родне село,
Де мі у моім жылоті
Было все весело.

Часто чую в своїх думках
Спів пташків на полі,
Як мене за домовинов
Моє сердце коле.
Хоць уж і моє волося
Стрібром переткане,
Моє сердце споминати
Уж не перестане.

Просьба за бідны діточкы

Боже, за бідны діточкы
Спинам к тобі руки,
Щі невинны, нйя не терплять
Превеликы мукы.
Нйя не вмерають з голоду,
І нйя не хворіють,
Кедь ся народили на світ,
Нйя з радости жыють.
Хрань іх од вшыткого злого,
Они щі не жыли,
Проти ничіім законам
Ся не провинили.

Свій живот щі лем зачали,
Уж мусять вмерати.
Дай і їм радість з живота
На землі спознати.
Чоловіка серце болить
Із жалю над нима,
Вымінив бы і свій живот,
За їх живот з нима.
Хоронь діти в цілім світі
Од болю, терплія,
Няй ся дожыють старобы,
І Твого спасіня.

Боже, за діточкы в світі
Спинам к тобі руки,
Щі невинны, няй не терплять
Превеликы муку.

Дякую ті, мамко

Дакую ті, мамко,
За вшытко, як мамі,
За нелегкый живот
Прожытый із нами.
Дякую за любов,
За ласкавы слова,
Же-сь про нас як мати
Все была готова.
Малых і великих
К собі притулити,
Руков погласкати,
Словом потішыти.

Як сьме росли, дома
Сонце все не гріло,
Бо і в нашій хыжі
Вшеліак ся жыло.
В радости і в біді
Ты нам говорила –
Жыйте так, жебы-м ся
За вас не ганьбила.

Про живот многому
Єсь нас научіла.
Дякую ті, мамо,
Же єсь про нас жыла.

Сміяла-сь ся на нас,
А в серці-сь плакала,
Як єсь нас із дому
В живот спроваджала.

Хоць уж тебе не є
Довго меджі нами,
В думках я тя віджу
Все перед дверами.
Кілько раз приходжу
До нашого двору,
Віджу тя стояти
На дверях до дому.

Дакую ті, мамко,
За вшытко, як мамі,
Ты зістанеш жыти
Вічно меджі нами.

*(Смолей, Штефан: Не ганьб
ся, Русине!, 2005. Пряшів:
Русин і Народны новинкы,
ISBN 978-80-88769-58-2.)*

Марія Гірова-Васькова

Родне гніздо

Родна земля

Земля наша родна,
Весміром што блудиш,
Лем ты нас єдина
ку собі притулиш.

Даш місто к животу,
К радости і щастю,
Згинути нам не даш
В годину найтяжшу.

Дякуєме, родна,
За плоды живота,
Няй не вбуде нігда
Із твоёй доброты.

Родне село

Село моє родне,
Село моє міле,
Якесь вже зістало
Страшно осиріле.

Запустіли горы,
Запустіли луку,

Не слідно вже нигде
Ту робітны руки.

Дворы, загороды
Забуйніли травов,
Страшенна цливота
Заставлює вам кров.

Плакати ся хоче
Сердцю в тій пустоті,
Увірити не мож
Тій страшній німоті.

Стою серед двора
В розвалинах дому,
Прогварити слова
Уж не є ку кому.

Стратило ся вшытко,
Навікы пропало,
у Стариньскім жрідлі,
В воді ся розмыло.

Лем водічка журчіть,
Чіста і прозрачна,
Її жрідло взяти
Никому не дасть ся.

Тече собі красно,
Обмывать скалиску,
Здоровя приносить
По наших сідлісках.

А мы, хоць з тяжобов
В серці одходили,
Думаєме, же многим
К здоровю проспіли.

Найдорогша мати

Щастливы то діти,
Щто щі мають матірь,
Доку їх пригартать
І з ласков помагать.

Як її не буде –
Холодно нам буде,
У нашій хыжчині,
В каженській кутині.

Наша планета

Говорять, же Земля
Єдина планета,
Єдина з розквітом
Людьского живота.

Але якого же?
Посудьте то самы,
Тадь чоловік страдять,
Што лем буде з нами?

Пекла ся допущать,
Трагедії брыдкой,
Ніщїть, рве, розбивать,
З глинов рівнять вшытко.

Зброю на ся вытяг
Не є ту радости,
Брат брата мордує
Без людської мілости.

Народы не знають,
Де ся діти мають,
З своїх родных обысть
В страху утікають.

Кутик бы хотіли
На тій Землі найти,
Кутик, де бы могли
Благый живот мати.

В спокою і в мірі,
В ласці і радости,
Такый кутик найти
Де повно вольности.

Што ся поробило
На прекрасній землі?
Де людський розум є?
Хто приводить к смерті?

Плането єдина,
Земелько прекрасна,
Світить іщі людём
Ясна зізда щастя?

Люденькове мілы,
Треба ся збудити,
Розум до рук взяти
І зло не чинити.

Земля моя й твоя
Няй красны сны пряде,
Бо раз може прийти,
Же ся нам розпаде.

Послїдній одказ

Плаче дівка в гаю,
Горенько нарікать,
Свої довгы косы
Над водов розплїтать.

Не хоче уж дале
На тім світі жыти,
Кедь мілый одышов
До войны служыти.

Никого не має,
Сама ту зістала,
Їх велику ласку
Война розорвала.

Так вірила, бідна,
Же щастлива буде,
Же з мілым доведна
Жылот перебуде.

Як двоє голубків
Міцно ся любили,
До конца жывота
Ласку сі слубили.

Але кедь по роках
Ку мілій вертав ся,
До неприятельских рук
В чужині дістав ся.

Загынув далеко
В пустыни, вертепах,
Своїй мілій не встиг
Зохабити одказ:

„Любив єм тя міцно,
Як Бог приказує,
Няй далшым жывотом
Щастливо путуєш.“

Чеканя на телефон

Боже, як недобрї
Кедь телефон німый,

Кедь ся в нім не озве
Хтось дорогий, мілый.

Лем слово ся хоче
Частіше учути,
Абы сердце могло
Легше в грудех бити.

*(Марія Гірова-Васькова: Родне
слово, 2008. Пряшів: Русин і
Народны новинки, ISBN 978-
80-887769-87-3)*

Людміла Шандалова

Напо ся водічки

Нянічку в небі

Нянічку в небі
я Твоя дітина,
вію днесь Тебі
віночок без терня.

Вію Ті молитву
з квіточок веселых,
білобов напиту,
як крыла ангелів.

Про твою мілость
зо Сонця травы,
про правды діло
з найвысшой Славы.

Дай ся мі, Нянічку
напити з прамія,
што нігда не сохне...
Я твоя дітина.

Прошу Тебе, Боже

Складам ручкы ку молитві,
прошу Тебе, Боже,
дай мі дничок пережыти
як лем дітя може.

Няй буде веселый, щастный
як мотыль у траві.
Твоїй тішу ся приязни
як пчола пулаві.

Няй мене мамочка, тато
все тулять к серденьку,
я обіцям Тобі зато
молитву маленьку.

Ангеличку мій

Ангеличку, стражничку,
хочу тя молити,
возьмий ня за ручку,
вказуй мі, де іти.

Ангеле любенький,
я іщі маленька,
напрям ня на дражку,
бо она узенька.

Може ся скрутити
до недоброй страны,
не дай мі зблудити,
Ангеле мій. Амінь.

Бы-м ся не бояла

О, Маріє, мати міла,
душічка мі звеселіла –
я молитву денно щіру
давам тобі на офіру.

Ангелы преславно поють,
благам Тебе, матірь мою,
на охрану зошлий – дай мі –
єдного із крылочками.

Із небесіх мій Ангелик
буде при мі – при постели.
Рано, вечур... бы-м я, мала,
нічого ся не бояла.

У твоім світлі

Подай мі, Господи, прошу,
у Твоім світлі каждый день
быти,
дай ся мі гріти,
няй ся мі душа веселить,
няй ся мі окупать, овлажить,
ожье,
няй ся оросить, дочіста умые,
поклонить в найвекшій покорі,

де світло все горить –
там до тепла завіє,
мнягонько приккрыє.

Подай мі, Господи, прошу,
у Твоім світлі каждый день
жыти,
дай ся мі гріти,
одожень мытаря,
няй ся мі любов пригварять,
облеч ня до чістой кошулі,
няй мене радість голубить,
дітхне ся, дотулить
в покої зо вшыткых стран
выгоїть з болестных ран.

Подай мі, Господи, прошу,
у Твоім світлі каждый день
жыти,
дай ся мі гріти...

За своїх

Господи Боже,
Ісусе мілий,
молю ся ку Тобі
з превеликой силы.

За свою мамочку,
мать ніжне личенько.
Все мене пригорне
на своє серденько.

За свого нянічка,
же є фурт веселый.
Возьме ня на ручки,
цілує на челі.

За свою сестрічку –
старшу о два рочки.
Красні мі зачеше
раненько варкочки.

За свого братика –
у колысочці є,
я го поколышу
сон ся му присние.

Кланям ся тобі

Є така звізда,
што ясно світить.

Є таке слово,
што ку мі спішить.

Є така слыза –
про ня ся лліє,
є теплий плащ,
што ня приккрыє.

Є свята мілость,
што мене спасить,
а добра вода
жажду угасить.

Любезне мено –
душу мі блажить,
жывот у правді
вкаже на дразі.

Умью сердце,
няй чісто мріє.
Кланям ся Тебі,
Преславна Маріє.

Душа моя

Господи мой, предвічний
Боже,
Творче неба і землі,
із Твоїх ангелі хтоже ня,
хтоже
поведе на путі земній?

Тяжко є, претяжко,
з Адама без рая
ходити за Ласков
од края до края.

Створивше мі тіло –
душа в нім звязана.
Предивне то діло,
предивне од Пана.

Тягобов склонена,
змачана од гріха,
од тугы зболена –
ве ся днесь до тиха.

Прагнувши покоя
квіточка у тіни,
ціла є несвоя
за людьскы провины.

Господи, Боже мой,
в Тобі мам надію,
же в світлі пречістім
душу сі умью.

До біла, біленька –
без найменшой скверны.
Душа є маленька...
Няй перейде дверьми.

*(Людміла Шандалова: Напю
ся водічки, 2020, Свідник:
тота агентура, ISBN 978-80-
972058-7-4)*

Осиф Кудзей

Замішка

Популярность

В природній фармі Пасія
стала ся вам сензація –
єдно Куря бройлерове
знесло яйце трикілове.

Вшыткы ідуть, гратулюють,
клічуть і телевізію,
ей редактор, Слимак Очко,
позвідовав ся Курочки:

„Можете мі речі, пані,
же што мате далше в плані?“
Она рекла Слимакови,
же сніє о пятькіловім.

Потім Слимак дав до кута
мікрофон перед Когута:
„Повіджте нам і вы, пане,
якы мате далшы планы?“

Когут повів: „В першім ряді
зроблю конець тій параді,
уж не знесу ганьбу таку –
дам Пштрсови по дзёбаку!“

*Часто тоты неморалны
тужать быти популярны –
не стулять ку собі гамбы,
но дають на бубен ганьбу.*

Вызнаня

Медвідь Кубо од Кремніці
писав до Татар саміці:
„Про тебе, моя розкошна,
зроблю можливе і неможливе –
в погодні і непогодні
піду по суху і воді
за тобов хоць на край світа,
жебы єм ся з тобов звитава...“

Зыйдь долов під Чертовіцію,
прийду за тобов в пятніцю
дополідне о десятій,
кедь не буде додж падати!“

*Великы діла є звыком
выконати лем языком.*

Критіка

Із фармы в Чаровнім Кругу
відять дві Свині радугу
і зо зраком на радугі
єдна з них повідать другій:

„Но посмотрь, мене поразить!“ -
На рекламу суть пінязі,
а на ліпше їдло ніт.
Несправедливый то світ!“

*Про істоту припоминам:
„Перлы не належать
свиням.“*

Фантом

Вечур по западі сонця
просила ся бездомовця
попід міст течуча ріка:
„Повідж, який же тот
гурікан?“

„Знаш водічко, сила тота
вношать зміну до живота –
приходить облестно, благо,
несе освіжіня з влагов...
По тім приємнім початку
зачне робити „порядкы“,
а о даякый час на то
возьме сі діти, дім, авто...“

*Но а тым є пояснено,
же чом мать все женське
мено.*

*Конець заграм до страчена:
Не за вшыткым злом є жена!*

Староновина

По трёх роках робот тяжкых
іде домів Сомар
і просить ся Свинкы Сашкы:
„Што нового дома?“

На тот вопрос Свинка міло
одповіла ёму:
„Дома ся ніч не змінило,
вшытко по старому.“

„Такый блуд мі повідати
ся ты не одважуй! –
Як єм ішов зарабляти,
жена была в тяжи...“

„То гей, была в другім ставі,
притакнув му Веперь,
„но о то ту іде праві –
она є і теперь!“

*З байкы о сомарьській файте
думку собі запиш:
Не вшытко є добрі найти
так, як то охабиш.*

Різіко

На прогульці в Мочаристім
гварить Глиста другій Глисті:
„Чом съте днесь пришли лем
сама,
де мате свого Адама?
Є мі то чудне, бо вчера
мали съте з собов партнера...“
„Не майте страх, є в погодні,
пустила єм го ку воді.“
„Як то? Допустив ся хыбы?“
„Ні, вытягли го на рыбы.“

*Не пусть партнера „ку воді“,
так як то є теперь в моді,
бо на ся береш різіко,
же ті пропаде навікы.*

Заосталось

Ословила Рыба Рака:
„Де ідеш, Клепетко?“
А одповідь была так:
„Допереду, тетко.“

Рыба на то: „Ні, сусіде,
то скрат орьентацный –
ты допереду не ідеш,
бо маш ход опачный!“

*Исто з властной
скушености
познате припады,
коли план до будучности
быв кроком дозаду.*

Текст

Єдного дня в обывачці
повідать Папагай Мачці:
„Коцур мі вчера повів,
же ты не любиш мій спів...“

Мачка покрутила хвостом
і рекла му цалком просто:
„Знаш, коли чую твій спів,
думаю, же єсь одурів –
мелодія красна фест,
но уха мі рїже текст!“

Птах скрічав на повну
гортань:
„Ты тому розумиш чор-р-рта! –
Знаш чом то так є, і буде?
Бо текст діставам од
людей!!!“

*Грїхом є бісіда пуста,
не бабрайме сі нєв уста.
З кого іде погоршіня,
чекать го плана одміна.*

*(Josif Kudzej: Zamiška, 2016,
Свідник: Плаціареґ сvidnicka,
ISBN 978-80-972571-8-7, s.
4-11)*

Юрко Харитун

Мої жалі

Кілько слов
хотять выповісти руки,
кілько обняти звїзд.
Зломены сны,
як з дїтинства
коник деревяный.
Хотять одтиснути муку,
тяжкы як скала.
Не можуть,
бо трїска-острак
під ніхтєм коле.
Зайду до Звалы,
до бабкы Липанї,
може найде зїля
на мої раны.

Мій край –
небо і рай.
Край малин
на роті дівчат.
Край чорніць
на лицах.
Лем час летить
і без плахт.

xxx

Заграй мі
фарбами квіток,
што ростуть під Бескідом,
тихом липового цвіту,
пахом малин,
шепотом вітра.
Палцєм забринькай
на струні,
лем не грай,
прошу тя,
плачом рікы не грай,
бо і гуслі
душу мають.

xxx

Над моїм гробом
не плач,
не квіль,
не садь лелїї.

В зимі не будуть білы.
Грїб
сілєв посып,
не заросте мохом.

Треба йти,
Господи.
Пришов день такый,
мілостивый.
Йдеме як дугы огнуты,
мы двигли до тебе руки.
Коло паркана йдеме в слызах,
Господи
мілостивый,
Захоронь нас.

xxx

Іщі вычістити
пішник до тебе,
Боже.
Не зашпонтати ся,
парадно йти,
без грїхів,
чістый і в душі,
але то мусиш посудити ты,
Боже
Мілостивый.

Все буду такый.
Ліпшый може тогды,
як зміню ся на порох.
Люблю зміны
форми,
не уніформы.
Може і попіль
потїшить ся урні.
До того часу
треба іщі
высувати рукавы на сорочці,
розсївати насїня до рядків,
вычістити пішник.

xxx

В загородці
єдина єдна
сонечніця росла.
На сонце її перемалюю,
може
на мене ся усміє,
Дякую, Боже.

xxx

Цілий світ
крутить ся зо мнов,
вішу як павук на павучині,
як пергач під турнів.
Няй крутить ся світ,
поскручам ся і я,
як з ябком їжак.
Залізу до хыжчины,
а ты Олено,
як веретено,
затанцюй мені.
Выберь мі із раны
склянчину,
поскладам своїх днів
мозаїку,
як дрыва під хыжу
до ракашів.

xxx

Коли співанка
пробудить ня із снів,
забуду на жалі,
забуду на гнів,
што выливать ся,
як кыпяток за сару
і вже не хочу
сміхом вмерати
із свого жытя,
яке барз люблю.

xxx

На вірш до рядків
выберай слова,
як насія на сіяня.
Дакотры слова
ненавіджу од души,
найгіршы такы,
што про жалі пишу.
Потім мені
д о в г о
смутно.

xxx

Ріка має своє корыто,
іскеркы огонь,
день має тїнь,
і ніч має темно.
А што маю я

вам не повім.
Із шпар думок
їх ніхто не выгребе.
Завтра знесу з пода
стару куделю,
бо клоча на ній посивіе,
ниткы на думкы спряду,
поскручам до клубяты,
бо сердце мі бє,
як на кроснах бердо.
Розповім вам,
Розповім,
лем ся наплю воды
спід Бескіда.

xxx

Дайме волю слову,
няй тече як розпещена ріка.
Няй ріже як ніж
і бурять як буря.
Гладить.
ласкоче,
потїшить сердца.
Лем няй не западе
порохом у книжці.

xxx

Коли колотять ся
в моїй душі
ненависть і злість,
не є ліпшых ліків,
як через зубы
процідити
пару віршів.

xxx

Кебы ся час
міг заставити,
на час вернути назад.
Згадкы як гады на сонцю
звивають ся.
Поскручам ся і я,
як їжак до клубяты
і десь під планков
позберам свої ябка.
На лавочці в саді
послухам кобылянок
колысанку.
Піпку нянькову
запалю в ночі.

В дымі не видно
зарошены очі.
Не плачу,
лем жаль мені
з гнізда выпало пташеня.

xxx

Жалі тварь помалєвали,
зорвали з нєй
радность.
І чело переорали
зморщками
на старость.
Тяжко,
тяжко на світї –
на стїні
в старім рамі
вісіти.

xxx

Сиджу на скалі.
Розсвічують ся факлі,
як лед студены.
Під нима ступляї
замулены піском.
Може потїчкы
розгребуть мул,
найдуть дорогу до моря
і однесуть жалі,
жебы
не булькали
в сердцах.

xxx

Приложите мі на груди
груду студеного леду,
бо пече од жалів,
як од жала пчїл.
Положите мі на грїб
книжку грубу,
мїй памятник,
мїй криж,
бо щастя ся выховзло
спід рук
як слиж.

*(Юрко Харитун: Мої жалі,
2010. Пряшів: Русин і Народны
новинкы, ISBN 978-80-89441-
04-4)*

ВЫШОВ ПРИРУЧНИК КУ ВЖЫВАНЮ РУСИНЬСКОГО ЯЗЫКА В СЛОВАЦЬКІЙ РЕПУБЛІЦІ

(Закончіня з 12. стор.)

► кедь є то можливе, позітiвно одповісти на жадости робітників посполных служеб, котры знають русинський язык, быти делегованыма на територію, де ся тот язык хоснує.

■ Словацька републіка ся завязує на основі жадости доткнутых особ доволити їм хосновати або перевзяти прызвіско в русиньскім языку.

МЕДІЇ

■ Словацька републіка ся завязує про вжывателів русиньского языка на територіях, де ся тот язык хоснує і подля статусу того языка в розсягу, в яким суть урядны органы прямо або непрямо компетентны, мають правомочі або повнять в тій области даякы задачі, решпектуючі притім прінціпы незалежности і самостатности медій:

► прияти вгодны крокы, жебы операторы верейноправного радія і телевізії понукали програмы в русиньскім языку;

► підтримовати і/або помочі реалізації періодичного высыланя приватных радієпрограмів у русиньскім языку;

► підтримовати і/або помочі реалізації періодичного высыланя приватных телепрограмів у русиньскім языку;

► підтримовати і/або помочі вырабляти і шырити звуковы і аудіовізуалны творы в русиньскім языку; підтримовати і/або помочі основати і/ або утримати холем едно періодікум выдаване на денній базі в русиньскім языку;

► ествующі установліня о фінанчній підпорі і на выробу аудіовізуалных творів у русиньскім языку.

■ Словацька републіка ся завязує гарантовати слободу прямого приниманя радіо- або телепрограмів із сусідніх штатів у языку, котрый ся хоснує в еднакій або близькій формі русиньскому языку і не сперати переносу програмів радіо- і телестаніць зо сусідніх штатів в уведженім языку. Далє ся завязує забезпечіти, жебы не настали ниякы окліщія слободы прояву і вольного току інформацій у пресі, котра хоснує язык в ідентичній формі або близькій русиньскому языку.

Імплементация тых слобод може підлігати законным окліщіяням.

■ Словацька републіка ся завязує забезпечіти, жебы інтересы вжывателів русиньского языка мали заступліня, або жебы ся з нима холем раховало в органах, котры мож створити в згоді зо законом з цілём гарантовати слободу і плураліту медій.

КУЛТУРНЕ ДІЯТЕЛЬСТВО І КУЛТУРНЫ ІНШТІТУЦІЇ

■ В одношію ід культурным актiвітам і культурным інштiтуціям – главно к бібліотекам, відеотекам, культурным центрам, музеям, архівам, академіям, театрам і кінам, як і к літературным творам і кінематографічній продукції, к народній культурній творчости, фестiвалам, культурному промыслу враховано, окрем іншого, схоснованя новых технологій – Словацька републіка ся завязує на територіях, де ся хоснує русинський язык, в розсягу, в яким суть урядны органы компетентны, правомічны або мають у даній сфері даяку роль:

► підтримовати проявы і актiвіты характерічны про русинський язык, як і підтримовати розлічны приступы к продукції в русиньскім языку;

► в розлічных формах підтримовати в других языках приступ ід творам створеным у русиньскім языку спомаганём і розвоём перекладательской работы, дабінгу, пост-сінхронізації і выробов титулків;

► підтримовати в русиньскім языку приступ ід продукції в других языках спомаганём і розвоём перекладательской работы, дабінгу, пост-сінхронізації і выробов титулків;

► забезпечіти, жебы організації одповідны за розвой і підпору розлічных форм культурных актiвіт в адекватній мірі загорнули знаня і хоснованя русиньского языка і ёго культуры до актiвіт, котры організують або котры підтримують;

► робити крокы з цілём, жебы організації одповідны за розвой і підтримованя розлічных форм культурных актiвіт мали к діспозиції персонал, котрый добрі знає русинський язык і язык других жытелів;

► підтримувати пряму участь репрезентантів вживателів русинського языка при створёванню культурных інштитуцій і плануванню культурных активіт;

► помагати і/або злегшыти створіня єдного або веце органів компетентных зберати, архівувати і уводити або выдавати продукцію в русиньскім языку.

■ **В областях, де ся традично не хоснує русиньскый язык, Словацька републіка ся завязує, кедь на даных теріторіях жые достаточна кількість вживателів русинського языка, забезпечіти можности, підпорити і/або забезпечіти вгодны культурны активіты або інштитуції або центры.**

■ **Словацька републіка ся завязує при імплементації своёй культурной політики в заграничу створити вгодный простор і про русиньскый язык і ёго культурны проявы.**

ЕКОНОМІЧНИЙ І СОЦІАЛНИЙ ЖИВОТ

■ **Односно економічных і соціалных активіт Словацька републіка ся на цілій своій теріторії завязує:**

► еліміновати зо свого правного порядку вшыткы установліня, котры без причіны заказують або окліщують хоснованя русинського языка в документах звязаных з економічным або соціалным жывом, главно в робочіх контрактах і в технічных документах, таких як інштрукції на хоснованя продуктів або інштрументів;

► заказати уводити додаткы, котры елімінують або окліщують хоснованя русинського языка в інтерных нормах фірем і в особных списках холем меджі вживателями того языка;

► протестувати проти поступам, цілём яких є одгварити особы од хоснованя русинського языка у сфері економічных і соціалных активіт.

■ **Односно економічных і соціалных активіт Словацька републіка ся завязує, кедь урядны органы мають такы компетенції, на теріторіях, де ся хоснує русиньскый язык, і кедь є то може:**

► забезпечіти, жебы інштитуції соціальной старостливости, як шпыталі, старобінці і притулки, давали можность прияты і старостливість у своім языку тым особам, котры хоснують русиньскый язык, кедь даны особы потребуьть старостливість із здравотных причін, внаслідку високого віку або з других причін.

ЧЕРЕЗГРАНІЧНА КООПЕРАЦІЯ

■ **Словацька републіка ся завязує, же буде:**

► реалізувати платны двосторонны і многосторонны договори, котрыма суть вязаны і штаты, в котрых ся хоснує русиньскый язык в ідентичній або близкій формі, або кедь є то потребне, снажыти ся прияты такы договори, котры бы мали підтримати контакты меджі вживателями русинського языка в приналежных країнах у сфері культуры, освіти, інформацій, одборной кваліфікації і ціложывотной едукації.

На доповніня Харты можете виходити тыж з установлінь **Рамкового договору на охрану народностных меншын**. Тым договором Словацька републіка підтримує створёваня вгодных умов, які помагають особам, які належать к народностным меншынам, **заховати і розвивати свою культуру і основны знакы своёй ідентіты (язык, віросповіданя, традиції і культурну дідовизну)** і хранити тоты особы перед асімілаціёв. Рамковий договор гарантує право хосновати мінорітний язык в публічнім жывоті і засягує до таких областей, як доступ к **учебникам**, право основати і вести своі властны **приватны освітні інштитуції**, право хосновати **хрестны мена** і уводити **назвы уліць** в мінорітнім языку, право розоставлєвати публічны значкы і написы приватного характеру в мінорітнім языку, **ефективну участь в публічнім жывоті** (враховано мімовладных організацій) і підписованя **договорів** з другыма штатами з цілём забезпечіти **охрану особ, які належать к народностным меншынам**.

НАТРАФИЛИ СЬТЕ НА ПРОБЛЕМЫ?

Органы і общества, котры были в Словацькій републіці легально створены, можуть Раду Европы упозорнити на проблемы звязаны з повинностями впливаючіма з Харты, котры Словацька републіка прияла. Стимулы розлічного характеру мож послати на:

European Charter for Regional or Minority Languages
Council of Europe
F-67075 Strasbourg/Straßburg
minlang.secretariat@coe.int

Языковы приручники были конціпованы так, жебы о кождім языку загорнутім до Европской харты регіональных або мінорітных языків принесли перегляд о платных про нёго установлінях. Тот цівілный языковий приручник не замінює Харту. Точны формулації вшыткых установлінь приятых окремыма штатами можете найти на інтернетовій сторінці Рады Европы: <http://conventions.coe.int>. Далшы языковы приручники ся поступно приготавлиють.

НАШ РУСКИ ЯЗИК У ШВЕТОВИМ РЕГІСТРУ ЯЗИКОХ

В недавних дньох сцигла вистка зоз Шветовой організації за реєстрованє языкох (SIL International) же 20. януара того року наш руски язык, хтори хаснуєме у Войводини одн. у Сербії, реєстровани у ISO 639-3 медзинародним стандарду за языково коди.

Наш руски язык (позн. ред.: **войводиньска ва-ріанта русиньского языка**) у SIL International достал тробуквови код rsk а у спомнутим реєстру ше го водзи под назву Ruthenian. Тот тробуквови код нешка значни прето же, як чаривни ключ, отвєра дзвери приступу гу етнологийним жридлом, лингвистичним листом, гу важним архивом у швецє, хаснує ше го у каталогийним систему библиотекох у швецє бо ше так оможлівює категоризованє нашого руско-го як окремого языка, коди ше часто хаснує у лингвистичней літератури, окреме кед назви языкох неясни або двосмислово. Тоти коди ше барз широко хасную у компютерских и информативних системох, як цо то Интернет, дзе велї языки треба же би мали комплетну потримовку.

На основу того тробуквового кода ше може витвориц можлівосц за уношенє нашого руско-го языка до компютерох, значи, же би ше при инсталованю Виндовсох або Линукса могло вибрац и наш руски язык як опцію (од часу кед лансовани Микрософтов Виндовс 8 та надалей ше дава подполна языкова потримовка у ISO 639-3 так як ше коди нових языкох одобрую). На познатей интернетовой шветовой енцикло-

педії Википедія було яки шветови язык мож поставиц лем теди, кед ма спомнути трословни идентификатор.

Иницијативу за реєстрованє руского языка у SIL International порушал новинар и публициста Гавриїл Колесар зоз Торонто у Канади концом 2017 року. У зложеним процесу реєстрації вельку помоц му дал др. проф. Михайло Фейса, по вокації англициста, хтори з науковима фактами обезпечел финализованє реєстрації, як и др. проф. Юлиан Рамач и мр. Гелена Медєши, шицки тройо познати лингвисти-русинисти.

Кед мамє у оглядзе факт же нешка ище вше вецей як 2 милиярди людзе не можу читац тексти на своїм языку вец таку реєстрацію руско-го языка з Войводини, хтори хасную лем 15.000 особи, у реєстре дзе шицки познати шветово языки можеме тримац за успех понеже ше наш язык неолуга найдзе на велїх информативних платформох як цалком ровноправни язык з тима найвекшима.

(Публикуєме в ориґіналі – войводиньскім варіанті русиньского языка.)

Мр. Михал ПАВЛІЧ, ПгД., Інститут русиньского языка і культуры Центра языків і культур народностных меншын Пряшівской універзіты в Пряшові, Словакія

ДУХОВНА ПОЕЗІЯ ЛЮДМІЛЫ ШАНДАЛОВОЙ (2) (Дакілько позначок ку зборнику Напю ся водічки.)

(Продовжїня з попереднєго чїсла.)

З погляду учелу молитвы можеме повісти, же в зборнику ся находжають вершы-молитвы петічного і непетічного характеру. В петічных вершох ся найчастїше жадать або просить о Божу охрану в змыслї Божой притомности ці веджіня („... на охрану зошлий – дай ми – єдного із крылочками.“, с. 32), загнаня страху („Бы-м ся не бояла“, с. 32) або даколи іде лем о просте скромне желаня добрых снів: „До нєй сничкы, Боже, / уткай ми. Ты можєш. / Лем ты можєш

знати / як ми їх уткати.“ (с. 16). Нігда не йде о желаня або просьбу за дашто себецьке.

Субект тыж жадать од Ісуса угасити жажду по познаню, котра є характерна про дітину спознаваючу світ: „Ці мать небо влагу вічну? / Глядам одповідь. (...) Науч ня, Ісуску, правді, / няй угашу смед.“ (с. 10). Дітя в Шандаловой вершох спознавать нелєм фізичный, але і духовный світ, снажить ся найти одповідь на вопросы розлічных аспектів віры („Ісуску міленькый, што значіть постити? (...) Як іші, Ісусе, молишь ся діти-

на? (...) *Што іщі мі треба, Ісусе, робити?*" (с. 36). Положены вопросы суть снагов о потвердженія ці схваліня назорів дїтьского субъекту, указує ся, же субъект є на справній дорозі і сам поступно приходить к познаню, же жыти з Богом і подля Бога є жыти честно і моралні. Дітьскый субъект ся так венує себерефлексії і інстроспекції, пригварять ся непрямо і сам ку собі і упевнює в собі моралны цінности і цности: „*Серденько мое / кротко ся тримай (...) Не впуцай пыху / душічко моя*" (с. 22).

Вершы непетічного характеру выядрюють позітивны емоції як подякованя (родічі суть браны як пожегнаня, за котре цалком природно дякуєме Богу: „*При мамці за каждый дничок / Ісусе, дякую.*" (с. 26) або радость з екзистенції – суть выядрінём невинного надхніня дїтвака, котрый обявлює світ навколо і находить красу всягды коло себе. А хоць чоловік може в доспелости тото надхніня легко стратити, тот факт в книжці не є коментованый, зато і гармонічний тон цілого зборника не є нияк нарушеный.

Може найтяжше ся выядрює ку квантитативній сторінці молитвочок в зборнику, лірічний субъект не можеме подробити зрахованю ці міряню довжкы, фреквенції або конзистентности моліня. В істім змыслі але можеме найти одповідь в постою лірічного субъекта к моліню. Дїтвак у Шандаловой вершах внимать моліня як дашто природне, каждоденне і подобні як Бог притомне в кожій сторінці (людьской) екзистенції. Не значить то, же бы к акту моліня приступовав як ку самозреимости, або рутині без значіня ці глубшого переживаня, праві наспак. Іде все о акт комунікації, котрый мать велику годноту, а дїтвак собі то усвідомлює.

В подобнім дусі, часть вершів ся подобать формов або каденцієв класічній молитві (можеме спомянути напр. стих *Ангеличку мій зачінаючій подобні як знама молитва Ангеличку, мій стражничку* і кончаючій словом „*Амінь*“, с. 30; форма молитвы-просьбы *У твоім світлі*, с. 40, ці подякованя за пережитый день в стиху *Молитва на каждый день*, с. 60). Шандаловой молитва але не є стріктні вязана релігійныма формулками або „сухов“, „доспелацьков“ важностєв. Вольный штїл молитвочок є подобный природному справованю дїтины – представляє скорше упрімну і непосредную бісїду без даякых фалошностей або окрас ці „*ходжїня коло горячой кашы*“.

В принципі так зборник выядрює думку, же

така форма молитвы є легітимна а цалком впорядку (тадь докаже то і мале дїтя!), і утверджує так читателя, же Бог є все доступный про каждого з нас. Лем треба хотіти...

6. Заключіня

Зборник духовной поезії *Напю ся водічки* považуєме за єден з найліпшых творів Людмілы Шандаловой. Уж у першых зборниках поезії про дїти, котры представлєвали просты вершы о звїятках, было ясне, же у авторкы є естетічна сторінка ей літературной творчости на высокім місці. Платить то і про *Напю ся водічки* – старостливый выбер слов і вершованя, мінімалістична красота ілустрацій і нічим ненарушены годноты заміру.

Цїлково можеме повісти, же зборник дїтьской духовной поезії Людмілы Шандаловой ся вызначує позітивнов наладов, гармонієв і змірливостєв, не находжають ся ту вершы з негативныма емоціями як є гнів або жаль, але праві наспак, іде о выядріня гармонічного одношіня ідеалізованой дїтиньской невинности ку божскому принципю. Можеме повісти, же верш „*Я щі лем дїтина, я знам лем любити...*“ (с. 36) нелем точно описує дїтьску простоту, упрімность і нефалшованость, але єдночасні доконало репрезентує цілый выдареный зборник.

ЛІТЕРАТУРА

- ANONYM. (2021). *Attachment theory*. [цит. 2021-12-27]. Доступне з: <https://en.wikipedia.org/wiki/Attachment_theory>
- FROESE, P. — JONES, R. (2021). *The Sociology of Prayer: Dimensions and Mechanisms* [online]. In: *Social Sciences 10: 15*. Dostupné na: <<https://doi.org/10.3390/ssci10010015>>
- PETERKA, J. (2007). *Teorie literatury pro učitele*. Jiloviště: Mercury Music & Entertainment s.r.o., ISBN 978-80-239-9284-7, 346 s.
- RÚFUS, M. (2014). *Modlitbičky*. Bratislava: Slovenské pedagogické nakladateľstvo – Mladé letá, ISBN 9788010026012, 72 s.
- RÚFUS, M. (2019). *Nové modlitbičky*. Bratislava: Slovenské pedagogické nakladateľstvo – Mladé letá, ISBN 9788006006080, 94 s.
- SLIVKOVÁ, I. (2021). K dvom básnickým zbierkam Eleny Chomovej-Hriňovej. In: Копорова, К. (ed.). *Studium Carpatho-Ruthenorum 2021. Štúdie z karpatorusinistiky 13*. Prešovská univerzita v Prešove – Centrum jazykov a kultúr národnostných menšín, Ústav rusínskeho jazyka a kultúry, ISBN 978-80-555-2863-2, s. 21-29.

Споминаме на русиньского вытварного умелця АНДРІЯ ГАЯ, котрый бы ся недавно дожыв 90 років



29-го януара 2022 минуло 90 років од народжіння русиньского маляря, ілюстратора і педагога вытварного уменя Андрія Гая. Векшыну свого творчого жывота пережыв родак із Сукова в Пряшові.

Народив ся Андрій Гай у Сукові, в окресі Гуменне, 29-го януара 1932-го року. Закончив руську гімназію в Гуменнім і далше штудовав у рр. 1952 – 1958 на Высокій школі вытварных умень в Братіславі. По абсолвованю высокої школы зачав робити в Пряшові як вытварный редактор українського часопису *Дружно вперед*. В рр. 1960 – 1973 робив на Педагогічнім інштуті і Катедрі вытварной выховы Педагогічної факулты у Пряшові Універзіты Павла Йозефа Шафаріка в Кошіцях.

Од 1973-го року був слободным умелцём. Курто учів і на Народній школі уменя і знова і на Катедрі вытварной выховы. Малёвав главно пейзажы, портреты, фігуралны композиції, закутины країны. В періоді років 1960 – 1990 вытворив множество монументално-декоративных творів у архітектурі, малёб на стіну, камінных і керамічных мозаік.

Андрій Гай мав веце як 50 персональных выставок і взяв участь на коло 150 колектівных выставках. У 1987 році здобыв медайлу *За розвоі окресу Пряшів*. В тім самім році му была передана в Кошіцях *Премія крайского народного выбору* за камінну мозаіку. З нагоды ёго 80-ых народенин у 2012-ім році была му передана *Ціна пріматора міста Пряшів* за довгорочный і вынятковый вклад у области вытварного уменя і репрезентацію міста дома і за границями.


Андрій Гай наперед выставлёвав дома і за границями як словацькый або як український умелець, но **по 1989-ім році ся припоів ку далшым пряшівским умелцям на выставках русиньского уменя.**

Андрій Гай умер 15-го фебруара 2016-го р. в Пряшові. Мав 84 рокы.

П. М.

Припоминаме сі 90 років од народжіня а 15 років од смерти русиньского умелця ЮРІЯ КРЕСИЛЫ

Юрій Кресила (Juraj Kresila) нар. 13. 4. 1932 у Михайлові тогдышній Чехословакії, теперь на території Словакії, умер 22. 3. 2007 у Пряшові на Словакії. Быв русиньским вытварным умелцём і високошкольским педагогом.



• Юрій Кресила

Ю. Кресила ся учів на Учілицу вытварного і промыслового уменя в Угерьскім Градіщу на Мораві (1951 – 1955) і Високій школі вытварных умень у Братіславі (1955 – 1961). На високій школі быв ёго учітелём далшыи русиньскый вытварный умелець Дезідерій Міллий.

Ю. Кресила учів малёваня на Філозофичній факулті у Пряшові Універтзیتی П. Й. Шафаріка в Кошіцях (1961 – 1963, 1967 – 1978) і на Високій школі вытварных умень у Братіславі (1978 – 1990), ту ся став доцентом в році 1978. Потім ся вернув до Пряшова.

Найвекшу славу Ю. Кресила здобыв за свої портреты, фігуралны композиції і акты. Штіл умелця характерізують контрастны фарбы і ясны контуры. Майстер створив тыж мозаікы великого розміру про верейны будовы міст на выходній Словакії. В послідніх роках малёвав главно закутины країны, де жыють Русины, а найвече тіпічны деревяны церьковці.

Почас років творчости ся представив на многых персоналных і колектівных выставках на Словакії і за ей границями. Од р. 1989 брав

участь на выставках русиньских вытварных умелців на Словакії і в заграничу. Меджі іншыма і на I. Біенале русиньских малярів у Шарішській галерії в Пряшові, котра была частёв культурного програму 7. Світового конгресу Русинів в р. 2003.

Здобыв і ряд оцінінь, єдным із них была Премія председа Пряшівского самосправного краю у 2016 р.

Здрой: Мгр. Александер ЗОЗУЛЯК, „Енциклопедія історії та культури карпатських русинів“ зоставителів П. Р. Магочія і І. Попа, Ужгород: Видавництво В. Падяка, 2010, с. 376, переклад із українського языка: А. З.



• Юрій Кресила: Портрет Федора Віца (знамого русиньского карікатуристы із Пряшова), 1973, олій.

Председа Народной рады Русинів Закарпатя ЄВГЕН ЖУПАН: „Нихто не може підтримувати агресора!“

24-го фебруара 2022-го року в скорых ранних годинах з боку Російской федерації дішло ку напад на Україну. Хоць Кремель говорив о „воєнській операції“, котра мала быти „мірнов місієв“, цілий світ є згодный в тім, же Росія зачала скуточну войну проти України.

Контактовали сьме председу Народной рады Русинів Закарпатя, Заслуженого лікаря України, **Євгена Жупана** (на фотці), котрый нам дав коротке інтервю, жебы описати сітуацію і позицію Русинів.



• Поне Євгене, яка моментално сітуація на Підкарпатю?

– На Підкарпатю, єднако як в цілій державі, є выголошений войновый став. То значить, же суть обмеджіня. Суть перерваны і роботы політичных і сполоченьских організації. Робити тепер даякы засіданя не мож. Но в порівнаню з іншыма регіонами України – выходныма ці централныма, мы маєме ту іщі покій. Правда, є мобілізація, будуть брати мужів у віці од 18 до 60 років і з нашої области. Обще сітуація є тяжка. Агресія є агресія. І нихто агресію не може підтримувати! Без огляду на будьякы комплікованы діла, на даякы невырішены проблемы, котры маєме. Они днесь суть другоряды в порівнаню з агресієв і небезпеченством, котры суть у цілій державі.

• Вы тепер не годни скликати Народну раду Русинів Закарпатя, но Вы председа. Зато ся звідую Вас, яка бы мала быти русиньска позиція односно войны, котра зачала?

– Позиція є ясна. Мы Русины все проти войні, проти агресії. Тепер сьме сучастєв України. І то ясне діло, же то наша держава. Коли нашу державу напав агресор, ясне, же протестуєме проти того.

Хотіли бы сьме, жебы ся война чімскорше скончила. Жебы собі політици сіли ведно і нашли компроміс. Жебы просто не гынули мірны жытелі. Уж і так є много мертвых і матеріалных страт. Іщі раз, наша позиція є ясна – проти войны, проти агресії.

• Вы робите в шпыталю. Як сітуація овпливила Вашу роботу?

– Якраз тепер єм в роботі. Далше маєме продовжувати у нашій звычайній роботі – помагати хворым. Но маєме огранічіня, же будеме мусити перекладати даякы напланованы операції, і як буде треба, не дай Бог, будеме мусити першорядо помагати раненым. Маєме свої лікарьскы обовязкы. Затля вшыткы робиме на своїх місцях. Вшыткы шпыталі фунгують. Маєме добры засобы ліків, котры бы сьме могли потребувати. Але покля будуть

дале проходити боєвы атаки, сітуація ся може згіршыти і в шпытальях. І як видиме на выході, апетіт агресорів є доста великий.

• Який Ваш одказ про Русинів у світі?

– Вшыткы бы мали вказати солідарность і поставити ся проти войны. Бо то не є біда лем про Україну, нелем про наш, або другы регіоны. То є дзвонк-сігнал, же таке може продовжувати а огрожувати і далшы державы. Агресія, котра днесь іде, іде од єдного славянського народа до другого славянського народа. Таке тяжко бы было собі колись представити. І зато **Русинам цілого світа треба підняти свій голос проти того. Проти агресії. Проявити свою солідарность з нами і з нашов державов Українов, в котрій мы тепер жыєме.**

То є наша земля. Нихто бы не хотів стратити свою землю, жебы вмерали люде, жебы нашы близкы терпіли. Зато люде, котры днесь жыють в покійній, мірній державі, мали бы проявити солідарность, дати поміч. Будеме бізовно потребувати кров, лікы, медічны матеріалы, але і фінанції.

*Коротке інтервю віз: Петро МЕДЕВІДЬ,
ЛЕМ.фм.*

Выголошiня ОСРС односно сiтуацiї на Українi

Приносиме вам Выголошiня Округлого стола Русинiв Словенска односно сiтуацiї на Українi, котре прияла президiя 26-го фебруара 2022-го року.

„Дня 24-го фебруара 2022-го року Росiйска федерацiя напала на свого сусiда – Україну. Дану сiтуацiю слiдуеме iз жалём, дiяння Росiйской ферерацiї не є лем дiянём проти Українi, але i проти демократiчним i людським цiнностям, на котрых є збудований свiт по Другий свiтовий войнi. Не є жадных похыбностей о тiм, хто напав на кого, i хто ся лем бранить.

На Українi маеме нашу найвекшу русиньску комунiту. Наши русиньскы братя i сестры днесь терплять ведно iз вшыткыма жытелями Україны, котры ся боять о свої жывоты, жывоты своїх близкых, родiчiв, дiтей. Хоць Русины доднесь не были Українов, як єдин-нов краiнов, узнаны за окремый народ, не суть їм признаны їх народностны права, тым найважнiшим про нас теперь є закончiти войну, вернути мiр, жебы не вмерали невинны люде.

Округлый стiл Русинiв Словенска высловлюе свою солiдарность нашым русиньским бра-там i сестрам на Українi. Свою солiдарность єдночасно высловлюеме вшыткым жытелям Україны, цiлій украиньскiй державi. Думками сьме з вами. Ваш бiль проживаеме з вами. Ваши слызы суть i нашыма слызами. Русины все были проти войнi, проти агресiї. I теперь ясно одсуджуеме агресiю i сьме проти войнi, котру зачала Росiйска федерацiя.

Просиме вшыткых, котры будьякым способом годни помочи людём з Україны – людём, што днесь проживають найгiршы часы, жебы так зробили.

Гуманiтарна помiч в подобi фiнанчного дару на рахункы органiзацiй, котры уж про Україну выголосили збераня грошей на куплiня потребного товару, якый ся уж зберать про утеченцiв або ся везе прямо на Україну, цi понука притулку про утеченцiв, котры будуть приходити, є днесь тото найменше, што можеме зробити.

Памятайме на то, же война на Українi є огрожiнём мiру i слободы нелем про Україну, але про цiлый свiт. Маеме надiй, же собi то усвiдомлюють i свiтовы лiдры, i чiмскорше найдуть одповiдны дiпломатiчны рiшiня, жебы войну заставити. Желаме Українi i свiту мiр!“

Петро МЕДВIДЬ, ЛЕМ.фм

Выголошiня Свiтової рады Русинiв ку сiтуацiї на Українi

Приносиме вам Выголошiня Свiтової рады Русинiв односно сiтуацiї на Українi, котре прияли членове рады на своїм засiданю в Перегу Маре, в Румунiї в суботу, 26-го фебруара 2022-го року.

„Свiтова рада Русинiв высловлюе солiдарность Українi, хоць до днешнёго дня Україна Русинiв як народность не узнала. Русины на Українi жьють i самы свiдчать о тiй трагедiї. В тых днях сьме ся стали свiдками воєньской атакы на Україну з боку Росiйской федерацiї, з котров нхто з цiвiлiзованого свiта не може быти згодный. Солiдарiзуеме з нашыма людми, як i з iншыма народами, котры жьють на Українi. Свiтова рада Русинiв i надале зiстае вiрна своїй мiсiї – репрезентацiї русиньской iдентiты в краiнах, де жьють Русины. Зато i надале потребуеме од влады Україны, жебы узнала Русинiв i їх права на основi Рамкового договору, котрый Україна пiдписала 1-го фебруара 1995-го року i котрый здобыв платность 1-го мая 1998-го року. Мы i надале жадаме, жебы План крокiв рiшiня проблемiв Українцiв-Русинiв приятый 7-го октобра 1996-го року i пiдписаний вiцепремером Україны I. Ф. Курасом був анулований. Надiяме ся на якнайскорше i мiрове вырiшiня даного конфлiкту.“

Америцький русинський вістник був заснований перед 130 роками

„Американскій русскій вѣстникъ“ („Amerikansky russky viestnik“ – найстаршы новинкы, котры ся выдавали найдовше зо вшыткых русинсько-америцькых новинок (1892 – 1952). Быв то офіціальний друкований орган Унії („Обєднання“) грекокатолицькых рускых (позн. ред.: розумій – русинських) братств із центром в м. Гомстед (штат Пенсілванія).

До 1926 р. ся друковав окреме кіріліков (русинське виданя) і латиніков (славянське виданя). Вершыну досяг у 20-ых роках 20. ст., коли выходив трираз до тыжня у кількості 40 тисяч фалатків. Ёго редактором-заснователєм був (1892 – 1914) Павел Жатковіч. Меджі впливних редакторів належали тыж Михайло Ганчін (1914 – 1920), Джордж (Юріон) Терзе (1920 – 1929), о. Стефан Варзалій (1929 – 1936) і Михайло Роман (1937 – 1952).

Почас свого естования новинкы бранили русинськы інтересы, стояли проти пробам Українців з Галічі, котры ся снажили здобыти перевагу в грекокатолицькій церькви в США; новинкы таксамо ставали на обрану права священників женити ся і на підпору інших традицій выходного обряду, якы были нападжены Ватіканом. По Першій світовій війні „Американскій русскій вѣстникъ“ підпоровав припоїня Русинів ку Чехословакії, але пізніше, зато же чехословацька влада не зреалізувала свої обіцянкы одностно автономії Підкарпатя, ставляли ся ід ній критічно. Ведучі новинок выступали тыж проти припоїню Підкарпатської Руси у 1945 р. ід Советському союзу.

У 1952 р. намісто русинськоязычного виданя „Американскій русскій вѣстникъ“ зачали



выходити англоязычны новинкы „Grek Catholic Union Messenger“ (1952 – 1992).

Література: Paul Robert Magocsi, „The Carpatho-Rusyn Press“, in Sally M. Miller, ed., *The Ethnic Press in the United States* (Westport, Conn., 1987), pp. 15-26; James M. Evans, *Guide to the Amerikansky Russky Viestnik*, Vol. I: 1894 – 1914 (Fairview, N. J., 1979); Robert A. Karlowich, *Guide to the Amerikansky Russky Viestnik*, Vol. II: 1914 – 1929 (New York, 1999).

Здрой: „Енциклопедія історії та культури карпатських русинів“ зоставителів П. Р. Магочія і І. Попа, Ужгород: Видавництво В. Падяка, 2010, с. 7-8, переклад із українського языка: А. З.

Споминаме на ЮРІЯ КОСТЮКА – з нагоды 110 років од народжіня

Юрій Костюк (Juraj Kostuk, псевдонім: Юрій Костё) нар. 3. 3. 1912 у Сірмі (Дротинці) тогдышнёго Угорьского кралёвства, теперь на території України, умер 12. 7. 1998 у Пряшові на Словакії. Быв музыкантом, педагогом, фолклорістом і хормайстром на Підкарпатській Руси і в Пряшівській области.

По скончіню Мукачовской державной коедукачной учительской семінарії (1927 – 1931) Ю. Костюк ся учів у дакількох початкових школах Підкарпатської Руси. Желаячі учіти музику на высшій уровни, зматуровав і здобыв діплом Му-

качовской гімназії (1935), наслідно пішов штудовати музику на Універсіту Карлову і Штатну конзерваторію у Празі (1938). Потім учів музику в Ужгороді і в Празі (до року 1947), аж докы не скончів штудії на Універсіті Карлові в Празі.

На Словакію пришов в році 1948. Зачав вчителёвати в розлічых школах Пряшова. В роках 1958 – 1977 учів у Пряшові в рамках Універзیتی П. Й. Шафаріка у Кошіцах, де ся в році 1966 став доцентом.

Ю. Костюк ся став знамым главні зато, же в роках 1929 – 1978 заложыв выше 40 аматерських фоклорных ансамблів на Підкарпатській Русі і в Пряшівській області. Быв закладателём „Українського народного ансамблю пісні і танцю у Меджілабірцях“ (1953). Тот фоклорный колектів був попередником „Піддуклянського українського народного ансамблю (ПУНА)“. У роках 1956 – 1957 був ёго умелецьким ведучім-сполузаснователём. Векшына репертоару аматерських і професіональных ансамблів, котры Костюк заложыв была взята із ёго обягово великих зборників і обробок русиньских народных співанок, з яких много вошло до слідуочіх публікацій: „Народ-



нѣ пѣснѣ подкарпатскихъ русиновъ“ (1944), „Пісні для дитячючого-жіночого хору“ (1952) і „Українські пісні Пряшівського краю, том I“ (1958) (Позн. ред.: Были то русиньскы співанкы, але в тім часі у Чехословакії Русины не были узнаны.)

Скомпонував дакілько кантат, якы тематічно были звязаны із сучасным жывотом русиньских земель: „Токаїк“ (1949), „Вітчизно-мати“ (1957) і „Прапор наш багрянйй“ (позн. ред.: ?!) (1958).

Література: Володимир Любимов, Ю. Ю. Костюк (Пряшів, 1982).

Здрой: Проф. Др. Павел Роберт МАГОЧІЙ, „Енциклопедія історії та культури карпатських русинів“ зоставителів П. Р. Магочія і І. Попа, Ужгород: Видавництво В. Падяка, 2010, с. 365, переклад із українського языка: А. З.

Мгр. Петро МЕДВІДЬ, ЛЕМ.фм

Припоминаме собі 55 років од смерти Грігорія-Ігнатія ЖАТКОВІЧА – першого губернатора Підкарпатської Русі

Кебы сьме мали спомянуги лем єдного чоловіка, котрый ся найвеце заслужыв о то, жебы Русины з їх територіями были припоєны ід Чехословакії, пак бы то бізовно був Грігорій Жатковіч.

Бывшый правник General Motors, родак із Підкарпатя (позн. ред.: нар. в селі Голубине 2. 12. 1886), поставив ся до веджіня Америцькой народной рады Угро-Русинів, і о чехословацькім напрямі доказав пересвідчіти так америцьку русиньську діаспору, як і домашні народны рады, котры были у вопросі будучности поглядово розділены, і котры наконець подарило ся соединити до єдного політичного блоку.

Навеце, то був якраз Жатковіч, котрый за русиньську чехословацьку будучность лобовав так в Америці на найважнішых в тім часі подіях, як і на мірных переговорах у Франції.

Жатковіч став, дало бы ся повісти смотря-



чі на ёго заслугы, логічно першым губернатором Підкарпатської Русі. Но губернаторованя тырвало лем короткый час. Точно перед сто роками зачав Грігорій Жатковіч „одходити“.

Призначіня за губернатора

29-го фебруара 1920-го року была прията Конштитуція Чехословацькой републікы, котра зачала юридічно діяти о дакілько днів пізніше, 6-го марца.

Хоць автономія Підкарпатя была записана в конштитуції,

была і предметом мірного договору з 1919-го року, і выменованя губернатора був логічний крок, но реаліта была інша.

Підкарпатська Русь дістала функцію губернатора. **За першого був выменованый Гріго-**

рій Жаткович. Стало ся так 5-го мая 1920-го року. Но реалны правомочі были і по выменюваню Жатковича за губернатора в руках чеського урядника, віцегубернатора Петра Еренфелда. Віцегубернатор був прямим надрядженим вшыткым цивільным державным урядам, був посередником про контакты меджі чехословацьков владов і урядами Підкарпатської Руси, і сполупідписовав вшыткы губернаторовы акты.

Віцегубернатор мав і окремы правомочі, міг ся в будьякім припаді докликати на владу. **Было лем вопросом часу, коли меджі губернатором Жатковичом і віцегубернатором Еренфелдом дійде ку нерішытельным конфліктам, што ся наконець і стало. Навеце, жадна автономія Підкарпатської Руси, на котру ся Жаткович надіяв, не приходила.**

Абдікація „на капітолы“

Грігорій Жаткович в марцу 1921-го року, по десятёх місяцях од наступу до своєї функції, вирішив абдіковати. Но цілый процес ся тїгав дакус довше, кедьже Прага демісію губернатора не хотіла прияти.

Быто то 16-го марца, кедь Жаткович подав демісію. В писмі пояснив президентови Масарікови, якы были причіны того кроку. Демісія представлєвала форму протесту проти поступованя пражской влады на Підкарпатській Руси як у вопросі автономії, так і в одношіню ку позиції губернатора, котрый був „губернатором лем своїм званём“.

Ку демісії дав Жаткович публічне выголошіня, же головнов причінов того кроку є намага схосновати будьяке средство, котре бы помогло тому, жебы автономія была зреалізована на Підкарпатю штонайскоріше.

Назначів таксамо, же бы міг розбігнути і заграничну агітацію, доконця погрозив, же в припаді неприятя своєї демісії, опублікує документи, котры компромітують чехословацьку владу і інших представителів Чехословакії.

Жатковичова демісія в тім часі не была владов прията. Навеце, до конца марца о тім влада ани нияк не інформовала.

Зачатком апріля ся часть чеськой пресы поставила за Грігорія Жатковича. Пражска газета *Tribuna* 5-го апріля вышла з оборонов губернаторовой позиції і ёго демісію означіла за штатницькый крок. **10-го апріля Жаткович знова жадав о приятя демісії.** О тім кроку інформовав як президента републіки, так і новинарів. Аж тогды зачала влада іднати з губернатором,

но тоты іднання не вели до нічого. **Хоць Прага хотіла, жебы Жаткович зістав у своїй функції, не хотіла прияти ани єдну з ёго пожадавок.**

Кедьже іднання скончили без будьякого компромісного результату, президент Томаш Гарік Масарік наконець 16-го апріля резігнацію першого губернатора Підкарпатської Руси прияв.

І кедь ся могло відіти, же є то рішіня проблемів, реално то був лем зачаток довшой конштитуційной кризи а кресло губернатора зістало аж до 1923-го року необсаджене. Криза то была досправдова, кедьже знепокоєвала і президента републіки, котрый о тім писав і у своїх особных позначках.

Одход до Споєных штатів Америки

Жаткович ся даякый час по резігнації іщі стримав на Підкарпатю. **До Споєных штатів Америки, де жив од свого дїтинства, вернув ся аж юли 1921-го року.** Одышов скламаний з поступу чехословацькой влады і підкарпаторусиньска політична сцена тым стратила найспособнішого і найдосліднішого опонента пражского централізма.

По своїм навернутю до Споєных штатів Америки Жаткович зачав з велічезнов пропагачнов активностєв. Про америцьких Русинів написав „*Expose Dr. G. I. Žatkoviča, bývšeho gubernatora Podkarpatskoj Rusi, o Podkarpatskoj Rusi*“. В дашто веце як 40-сторінковій публікації Жаткович аналізував цілый процес припоїня Підкарпатської Руси до складу Чехословакії як їй автономной области і намагы о реалізацію автономії по выникнутю републіки.

Крітік Чехословакії

Грігорій Жаткович вернув ся до Споєных штатів Америки, як уж было спомянуто скламаний. То і давав ясно знати.

Чехословакію по навернутю до Америки безперестанно крітіковав у многих своїх роботах. Мілосердным ку Чехословакії зачав быти знова аж по зачатку 2-ой світової войны, коли ся вернув ку ідеї, же найліпшов путєв про Русинів є быти по войні знова в державі з Чехами і Словаками. Жаль, історія ся вже зачала по войні писати цалком іншак. Умер 26. 3. 1967 у Піттсбургу штату Пенсільванія в США.

Здрой: архів АРК в СР, управене.

Юбілюючий науковець, професор ПЕТЕР ШВОРЦ

Петер Шворц (Peter Švorc) нар. 31. 1. 1957 у Ліптовськім Мікулашу тогдышній Чехословачії, тепер на території Словачії. Є словацьким істориком і високошкольським педагогом.

П. Шворц є одборником на історію Чехословачії першої половини 20. ст., главно історію виходної Словачії і Підкарпатської Русі того періоду. О тій проблематі читать лекції на Пряшівській універзиті в Пряшові. Опубліковав дакілько своїх работ, присвяченых проблематі припоїня Підкарпатської Русі ід Чехословачії і єї розвитку в меджівоиновых роках. Суть то главні дві знамы публікації: „Zakliata krajina: Podkarpatská Rus', 1918 – 1946“ (1996) і „Stručné dejiny Podkarpatskej Rusi, Vol. II: 1918 – 1946“ (1996).


Окрему позорность професор Шворц приділять проблематі визначіня етнолігвістичной граніці меджі Словачками і Русинами: „Krajinská hranica medzi Slovenskom a Podkarpatskou Rusou v medzivojnovom období, 1919 – 1939“ (2003).

Роботы професора Шворца виходять із єго довгорочных бадань і штудій архівных матеріалів і наслідного вивжытя архівных документів у своїх научных публікаціях. Роботы

професора Шворца ся визначують нестранным поглядом на русинський народный вопрос. Они приспіли к інформованю словацькой сполочности о історичній землі на виході од іх країны.

Література: Peter Švorc, *Personálna bibliografia do roku 2002* (Prešov, 2002).

Здрой: „Енциклопедія історії та культури карпатських русинів“ зоставителів П. Р. Магочія і І. Попа, Ужгород: Видавництво В. Падяка, 2010, с. 815, переклад із українського языка: А. З.



Юбілей професора ГЕНРИКА ФОНТАНСЬКОГО

Генрик Фонтанський (Henryk Fontański) нар. 30. 1. 1947 у Ченстоховій, в Польщі. Є польським лінгвістом і професором універзиты.

Г. Фонтанський учів російський язык у Высшій педагогічній школі в місті Ополе (1971 – 1978) і на Слезьській універзиті в місті Катовіце (од р. 1978; професор у р. 2000). Ту довгы roky робив як директор Інштитуту виходославянської філології Філологічного одділіня.

Од зачатку 1990-ых років активно сполупрацує з Русинами-Лемками у сфері кодифікації їх языка, опубліковав дакілько бадань на тоту тему. В шырокій научній творчости Г. Фонтанського ся находить много публікацій за-

нимаючих ся проблемами лемківського языка. То є, наприклад, „Граматыка лемківського языка“ (2000), якої є сполуавтором ведно з Мирославов Хомяк, ці „Студия над лемківським синтаксисом“ (2014). Выступав на многих научных семінарах або конфереціях, наприклад, і на IV. Меджінароднім конгресі русинського языка, котрый проходив у септембрі у 2015-ім році в Пряшові.

Юбілантови желаме многая і благая літа!


-а3-

РУСИН Одборный і літературный часопис выдавать Академія русинської культуры в СР (6х гоґне, náklad 1100 ks, IČO: 17079748). Предплатне 12 євр. Адреса редакції: Академія русинської культуры в СР, Duchnovičovo nám. 1, 080 01 Prešov, SR. Телефон: 0917 171 912. Шефредактор: Мгр. Александер Зогуляк, языковий редактор: ПгДр. Кветослава Копорова, ПгД., редактор: Мгр. Михал Павліч, ПгД. Регістрацны числа: ISSN 1339-5483, EV 328/08, MČ 49 589. Адреса на интернеті: www.rusynacademy.sk, e-mail: zozulakpo@gmail.com. Выдане 14. априля 2022 р.

KULT
MINOR

FOND NA PODPORU KULTURY NÁRODNOSTNYCH MENŠIN

Realizované z finančnou podporou Fondu na podporu kultúry národnostných menšín



• Польський науковець проф. др. габ. ГЕНРИК ФОНТАНСЬКИЙ, який ся довгы роки займає і лемківськїм языком, не так давно святковав 75 років жывота.

Фотка: А. З.



• Своїх 60 років життя перекрочив словацький научний працівник Пряшівської університету в Пряшові проф. П.Др. ПЕТЕР ШВОРЦ, к. н., котрий ся займає ай історієв Русинів.
Фотка: А. З.